

**KA
UMPOHLIEW
KI
UMJER
BNENG**



Acc. No. 309/AC
 Class No. 895.93 W. H. Lemp
 Author Wahlang, G. P.
 Title Ka Lempohleu de Lemp
Bneug.

Borrower's	Due Date	Borrower's	Due Date

Acc. No. 309/AC
STATE CENTRAL LIBRARY
GOVERNMENT OF MEGHALAYA
S H I L L O N G

1. Books may be retained for a period not exceeding **15 days** by members.
2. Books may be renewed on request at the discretion of the Librarian.
3. Dog-earing the pages of a book, marking or writing therein with ink or pencil, tearing or taking out its pages or otherwise damaging it, will constitute an injury to a book.
4. *Any such injury to a book is a serious offence; Unless a borrower points out the injury at the time of borrowing the book, he/she shall be required to replace the book or pay its price.*

Help to keep this book fresh & clean

G. P. WAHLANG



Ka

Umpohliw ki Umjer Bneng

(Ki Poetry Khasi)

"Nangtuid ko Umpohliw ba-thiang,
Ban dii ki Rang, ki Thei ba sliang,
Ki pateng ba dang sah;
La sur ba syiang to patied jam,
Kylleng ka Ri sha ba Phakam,
Shaduh ki Yrta-Bah."

1990

Published by Shri J. Kharmih
Jaintia Hills
JOWAI - 793 150



ALL RIGHTS RESERVED

*“This book was printed with
the Financial Assistance of the
Govt. of Meghalaya.”*

C C 1800

Don Bosco Press
Shillong


Ki Jinglaphrang

Nga dap da ka jingkmén ba'n ioh lad ba'n peit ia ki poim I Bah G.P. Wahlang ia kiba i la wallam hapoh kane ka thup. Ki don ka khubor kaba ktah ia ngi kum ka jaitbynriew khamtam ha kine ki sngi ha kiba ka jinglong-Khasi paka imat kala sdang ba'n jah. Lada ka'n poi kaba kum kata ka por, ha kaba kiei-kiei kiba ngi ju khein-kor kum ka jaitbynriew kila jah ne duh la ka dor, nga sngew ba ka jingjah noh khoit jong ka jaitbynriew ka la dep poi lypa.

U nongthoh u shim ia ka jingkitkhlieh ba'n kyrsiew ia ka jaithynriew na ka jingiohthiah ba pyniap, namar nga ngeit u sngew, kumba nga hap pynbor ialade ba'n sngew, ba ka por ka'n pat dier ba ngi ngi'n khie-khlieh biang.

Nga ngeit ba kine ki symboh ba shong-sbai ki'n hap
 ha ki dohnud kito na ngi kiba ieit ri shisha — ym namar
 ba ngi khmih lynti ba'n kjit ia ki spah ka ri haduh
 ba'n da pyntyirkhong khait ia ka, hynrei namar ngi sngew
 ba ngi don ei-ei ba'n noh synniang sha ka jingroi bad
 jingim ba pura kaba dei hok ba'n ioh.

Nga ai khublei ia u Nongthoh ba u la ai ka'lad ba
nga n pule thop ia ki symboh ksiar ha ka thup, bad
nga dwai ba U Blei U'n dang ai bor bad ai mypsiem ha



i ba i'n ym sangeh ia la ka kam ba'n hikai, ba'n sneng,
ba'n kyntu ia ka pateng ha kaba ngi im, khamtam ha ki
samla ka Ri khnang ba ki'n lait na kata ka apot kaba
u Myllung ka Ri u la kdew 55 snem mynshwa, ba ngin
ym long ki nongthohdieng bad nongtong um iano-re.
Ki dak ba ishyrkhei ki la paw wat mynta ruh ha ki jaka
tih dewiong ka Ri Jaintia, bad lada ki poim i Bah
Wahlang ki'n sawa kum u pyrthat ha ki shkor kiba dang
im, nga ngeit ki la pyndep ia la ka bynta.

Mawlai — Umjaiur
6th October, 1990.

I. M. SIMON

Corrigendum:

<i>Page</i>	<i>Dkhot</i>	<i>Line</i>	<i>Pule kumne</i>
7	—	5	III KI HYNNEWREP
13	—	13	“Ka Lieng-ksiar . .”
48	14	1	“Ban ieng rangbah u briew . .”
54	3	5	Tong jingiwbi..
72	—	14	Ka poi, kam poi .
75	—	17	Katba na lum jingtep

Acknowledgement

Ia i Bah I. M. Simon, iba la buh ia ki 'Tien Lam-phrang ba ai mynsiem;

Ia i Bah C. Wolflang, iba la iarap thiew kynbat lem ha ka lyngkha jong kane ka thup;

Ia i Bah J. Kharmih iba la pule bniah, ia ai buit lem bad shim ia ka jingkitkhlieh ban shon ia kane ka Thup;

Ia ki jingeh ba ka jaitbynriew ka iakynduh ha kine ki por, kiba la ktik (sensitised) ia ka jingmut jingpyrkhat jong nga ban ia tbeh prew lem ban ia ba ia ka Thymmei ba-rieh jong ka Ri bad ka Jaitbynriew,

Nga dap da ka jingsngewnguh eh.

Polo Hills,
Pynthorumkhrah,
Shillong 793 001
October 15, 1990.

U G. P. WAHLANG

Ka Jingkdew

	Sla
I. KA MAITPHANG	9
II. KA UMPOHLIEW BA-IM	
Ka Umpohliew	24
Ka Sur Ba-im	25
III. KI HYNÑIEW TREP	
Part I : Ka Jingkieng Sohpetbneng	28
Part II : Ha Syrngiew Ka Diengiei	33
U 'Si Kyrtong bad Ka Tyngab	36
Ka Phreit bad U Khla	38
Part III : Hapoh Jingdum ka Miet ba-jlan	40
Ka Dorbar u Lai-phew Doh	42
Part IV : Halor Ki lum ba jngum	46
Part V : U Symbai ba la sep	51
Part VI : Ka Lyer ba beh kyrthep	54
Part VII : Ka Krismas Basuk	56
Part VIII : Ki Rong ba phalang	61
Ki Rong U Simpyllieng	61
Ka 'Tiew Lalyngngi Pepshad	62
Ka Par Dewiong	63
Part IX : Ki Sur Ka Lawei	66

IV. KI SONNET	Sla
i. Ka Dewmet ba lyngki	70
ii. Ka Lynti sha Burom	70
iii. Ka Khubor babha	71
iv. Ka Jingmap-ei	71
v. Ka Eropleiñ ba khlem Pailot	72
vi. U Pud Ka Por	72
vii. Ka Jingkynjah ba ngiew	73
viii. U Lum Jingim	73
ix. Sha Lyndet ka Jingim	74
x. U 'Tiew Latos ha Nan Palok	74

I. Ka Maitphang

(INTRODUCTION)

Ka Jingiathuhkhana pateng naduh hyndai-hyndai, naduh ki sngi U Barim U Bajah ka ong ba u khun Khasi — Khara u long u khun ki Hynñiewtrep Hynñiewskum kiba long shi bynta na ki Khadhynriewtrep Khadhynriewskum kiba ia shong ia sah lang ryngkat bad u Blei Trai Kynrad Nongbuh Nongthaw hangtei ha bneng. Halor kane ka nongrim ka jingngeit ba skhem jong ka jaitbynriew, u Myllung So So Tham u ieng ban rwai :

*“Na Khadhynriew ba don ha jrong,
Hynñiew ki hiar shapoh ban shong;
Shaphang jong ki mano bam tip,
Ka nam jong ki lano kan lip !
Ha Ryngi ne hapoh Dymmiew,
Kin tip pateng ki khun ki ksiew;
Naduh ba mih haduh ba sep,
Ngi dei ki khun ki Hynñiewtrep.”*

Hangne la song khop ia ka jingmaian jong ka thymmei u khun Khasi-Khara; kata, ka thymmeiri bad ka thymmei-longbriew ruh.

Ki Hynñiewtrep ki Kpa Kulong jong ngi, kim dei ki jong kane ka Pyrthei : ki dei kiba la wan na sha kiwei pat ki pyrthei bymtip (extra-terrestrials) ha kaba U Blei Trai Kynrad u la shong. Namar kata, ki dei ban long ki blei ne ki khun U Blei.

Hato kane ka lah mo ban jia-long kumta ? Ne ka long tang ka puriskam-kai ba u Ni u Kong bad ka Bei ka Pun ki iathuhkhana byrngia hala ki khun ki ksiew sawdong ka lyngwiardpei ? Ngi kum ka jaitbynriew Khasi-Khara ngi ngeit ia ka kumba ngeit i Babu So So Tham ! Ne, ngi shim iaka ba ka long tang ka jingtip jingkynmaw kaba la sah tyrkhong — khap ha ngi kum i symbai tyrso ba hap halor mawsiang !

Ki don shibun ki jingthoh-jingtar bad ki jingiathuhkhana pateng ha pdeng ki jaitbynriew ba bun hangne ha sla pyrthei, kiba iathuh ia ngi ba la don bun-bun ki khep ha ki sngi ba la leit noh ba ki blei na bneng lyngba ki lieng ne ki kali bneng ba bun rukom ki la wan hiar sha pyrthei. Ka Mahabharata ka iathuh ia ngi shaphang u Bhima u ba la her da ka liengsuiñ Vimana jong u kaba kyrhuh kum u pyrthat bad tyngshaiñ kum ka Sngi ! Ha kane ka juh ka kitab ngi pule ruh shaphang u Arjuna u ba la leit jngai jngai eh ban wad ia ki blei ban ia pan tiarthma na ki. Bad haba u la shem ia ki, u Indra u Trai ka Bneng bad ka Sachi ka lok jong u ki la mynjur ban ia kynduh bad u ha poh ka kali-thma bneng bad ki da khot ruh ia u ban ia her lang bad ki ha suiñ. Ha ka Beibl ngi pule shaphang u Ezekiel u ba la batai bniah bad janai bha shaphang ka kali bneng kaba la wan hiar sha khyndew bad kaba la rah noh ia u sha suiñ katto katne por. Kumjuh ruh shaphang u Elijah ia uba la rah noh sha bneng da ka kali ding bad ki kulai ding ki ba her halor ka 'eriong. Ngi pule ruh shaphang ka jingiakynduh jong u Moses bad u Blei, mynba U Blei U la ai ha u Moses ia ki Shiphew Hukum. "Bad U Lum Sinai u la mih tdem baroh u wei, namar U Trai U la hiar halor jong u ha ka Ding". (Exodus 19:18)

Ha ka kot jong u ka ba la ai kyrteng "According to Evidence" u Erich Von Daniken u la iathuh shaphang ki jingiathuhkhana pateng na ri Afrika ki ba kdew shaphang ka bneng ba dap da ki briew bad na kaba U Blei U la phah ia la ki Nongrah-khubor sha pyrthei. Kine ki jinglathuhkhana pateng (Legends) ki kdew kumne :

Masai : Ki shilok kiba kynja-blei kiba la pynkha ia ki briew kiba tyngshaiñ bad kiba im junom.

Madi-Monui : Shaphang ki briew kiba nyngkong eh kiba im ha bneng bad kiba ia kiew ia hiar na bneng sha pyrthei. Tad haduh ba ka Sim jyrngam ka la puh noh ia ka Jingkieng lyngkhot lyngkhai; ka jing-jingiaiaid-iaien ha pdeng ka bneng bad ka pyrthei ka la don.

Nyoro : U Blei U la phah ia shilok ki briew na bneng haba U la thaw ia ka pyrthei.

Bena-Lulua : U Blei U la phah sawngut ki khun jong U na bneng sha pyrthei.

Shanti : Ki hynñiew ngut ki briew U Blei kiba la wan hiar sha pyrthei lyngba u Kynjri (Chain). Hadien ba ki la pynkha khun ia ki briew hangne, ki la leit phai noh sha la ñng jong ki sha bneng.

Ki jingiathuhkhana pateng (legends) hapdeng ki jait bynriew barim (Primitive tribes) ka pyrthei ki dap da ki ba kum kita ki-ei ki-ei ki ba kdew beit ia ka jingwanhiar jong ki blei ne ki khun U Blei na bneng halor ka snieh pyrthei. U Erich Von Daniken u la thoh bun tylli ki kot ha kiba u la pyrshang ban batai bniah lem bad ki sakhi-satar, ki dak ki shin ban pynshisha ia ka tynrai jingpyrkhat ne jingngeit (Theory) jong u, ba ha ki por barim bajah ia ka pyrthei la wan khmih da ki jingthaw ki ba na sha kiwei pat ki

pyrthei (Extra-terrestrials). Kine ki jingthaw ba ngi khot ki blei ki la ai ha ki briew ia ka jingshai, jingstad bad jingshemphang da kaba ki ai ha ki ia u symbai-bneng uba ia syriem ia ka dur jong ki hi. Bad ba ia kane ka jingjia la thoh ha ki kot ki sla, ka dieng ka maw, ha ki niam ki rukom bad ha ki jing-iathuhkhana pateng.

Sanphew snem mynshua, ki tei ki-ei ki-ei ki dang long kum ki khana puriskam. Ngi la ioh-i ba ki her ki liengsuiñ (Aeroplane); hynrei ngim shym la lah ban mutdur ha kata ka por ia ka jingher ki roket (Rockets) ki ba siat beit soit shatei sha bneng kum ki 'nam-bneng, lyngba ki syrtap ka haw-haw ba jngum na u wei u metbneng sha u wei pat ! Hynrei mynta kumno ngi shem ? Ki lieng ne kali bneng (Space-crafts) ba la kit da ki roket ki her kum ki kali ding ha ka haw-haw; teng-teng thylli bad teng-teng ki da kit ruh bad ki briew (Astronauts). Ki ATLAS bad ki SATURN - V roket ki la kit ia ki kali bneng GEMINI bad APPOLO jong ka Amerika sha ki jingjylliew jong ka suiñ, wat shaduh u Bnai ruh. Ka jingleit hiar nyngkong jong u briew halor u Bnai ka long kaei ka ei kaba sah jingkynmaw junom la junom. Ha kano ka rukom kane ka la jia ?

Ha ka 16 tarik u bnai Julai 1969, la kynting soit sha suiñ ia ka kali bneng APPOLO - 11 kaba khia 45 ton ryngkat bad laingut ki briew, da u SATURN - V roket jong ka Amerika. Shisien ai ding tiak (ignited), ka umphniang (fuel) jong ka lyngkhot- kyrdan kaba wei (stage - I) jong u roket ka la ing 2½ minit bad u roket lem bad la ka jingkit u la kynting sak 64 KM sha suiñ ha ka jingstet kaba 9600 KM shikynta. La pynhap noh ia ka lyngkhot-kyrdan kaba wei bad la ai ding sa ia ka lyngkhot-kyrdan kaba ar (stage - II). Ka umphniang jong kane ka lyngkhot-kyrdan ka la ing 6½ minit bad

u roket u la kiew sak haduh 160 KM ha ka jingstet kaba 24,000 KM shikynta. La pynhap noh ia ka lyngkhot-kyrdan kaba ar ruh bad da ka enjin (engine) jong ka lyngkhot-kyrdan kaba lai (stage - III) la pynher sa 2 minit bad la buh ia u roket bad ia ka kali bneng haka tawiar (orbit) kaba sawdong ia ka pyrthei 187 KM hangtei ha suiñ ha ka jing-her stet kaba 27,840 KM shikynta. Khadduh la ai ding sa ia ka lyngkhot-kyrdan kaba lai. Ka umphniang ka la ing ha ka $5\frac{1}{2}$ minit bad ka lyngkhot-kyrdan kaba lai ka la hap noh. Mynta ka kali bneng ka la lait noh na u roket bad marwei ka la suh wia sha ka haw-haw ha ka jingstet kaba 40,000 KM shikynta. Kane ka long ka jingstet (escape velocity) da kaba ka kali bneng, APPOLO-11 ka la lah ban ioh pylait ialade na ki 'sai-teh 'sai-khum ka Bor-jingtan jong ka pyrthei (the force of Gravitation), bad ka la ioh ban her laitluid soit shaduh u Bnai

Ka kali bneng APPOLO-11 ka don lai bynta ba la khot ka Service Module, ka Command Module bad ka Lunar Module. Katba ka APPOLO-11 ka nangjan ia u Bnai, la nang kham pynsuki noh ia ka da kaba pynbthei ia ki roket rit ba pynsuki (retro-rockets) bad nangta ka kali bneng ka la her ha ka tawiar kaba sawdong ia u Bnai (Lunar orbit). Arngut ki khun-bynriew ka pyrthei — u Neil A. Armstrong bad u Edwin E. Aldrin ki la rung lyngba ka thliew na ka Command Module sha ka Lunar Module. Nangta la pyllait noh ia ka Lunar Module na ka kali bneng baroh kawei bad ki da ia hiar suki haka haduh ban da poi halor ka sla u Bnei ha ka 20 tarik u bnai Julai 1969 hadien ba ki la her 4 sngi lynter.

Ka Service Module bad ka Command Module ryngkat bad u Michael Collins hapoh, ki ia iaaid tawiar ha suiñ sawdong ia u Bnai. Ynda haba ki arngut kiba la hiar sha u Bnai ki la dep la ki kam ki jam kumba la mang

ia ki ban leh, ki la rung noh ha ka bynta ba shalor jong ka Lunar Module. Nangta la siat biang da ki roket rit na shapoh bad ka Lunar Module ka la kynthih biang sak na sla u Bnai haduh ban da poi sha ka Command Module. Ynda ki la ia kynduh biang, ki arngut na ka Lunar Module ki la rung biang sha ka Command Module bad la pyllait noh ia ka Lunar Module ban tawiar sawdong ia u Bnai. Nangta, da ka umphniang kaba la don lypa ha ka Service Module, ka lieng bneng ka la her sak sha suiñ haduh ban da poi biang sha pyrthei.

Hato kane kam phalang mo ha ngi ia ki sngi ki Hynñiewtrep !

*"Ka Lien-ksiar lydui ha suiñ ka sdien,
Pynnoh ka Jingkieng-ksiar;
Na Ka shaduh khyndew sha tbian,
Ki Hynñiewtrep ki hiar"*

Ha kane ka jingher suiñ, u roket uba kit ia ka kali bneng u dei ban pynioh ia ka kali bneng ia ka jingstet kaba 40,000 KM shikynta (escape velocity) lymkumta u roket un hap noh sha tbian khlem poi bneng. Hynrei ha ka jingher bneng kaba thew sha kiwei pat ki pyrthei, sha kiwei pat ki khlur hapoh ka Hara-khlur (Milky Way) jong ngi lane sha kiwei pat ki hara-khlur (Galaxies), ka kut-lad ia u briew kam dei shuh ka jingtan ka pyrthei (Gravitation). Ka dei ka jing-bymilah ban her stet bad ka jinglyngkot eh ka jingim briew; namar ba ka jingjngai hapdeng ki metbneng ka long kaba maian shikatdei eh. Kum ban pyn-i nuksa : ka kali bneng kaba stet tam ba la pynher na pyrthei ka dei ka ULYSSES ba la pynher da ka Amerika ha ka 6 tarik u bnai October 1990 bad ka jingstet her ka long 55,000 KM shikynta bad u khlur uba jan tam na ka Sngi u dei u ALPHA CENTAURI. Une u khlur u jngai 4.3 snemher-jingshai (Light-year). Shisnem-her-jingshai

ka long ka jingjingai ba ka jingshai kaba her stet 3,00,000 KM shi sekhon kan her ha ka shisnem. Kane ka jingngai ka long kumba 94,60,80,00,00,000 KM. Kumta ka jingjingai u tei u khlur na ka Sngi ka long 40,68,141,00,00,000 lane 40, 68, 141 klur KM ! Kumta ki roket jong ngi kin shim por kumba 84,436 snem ban her ia kata ka jingjingai. Ha kane ka jingim balyngkot, lah hi ban ia poi sha kiba kum kita ki jingngai? Em, da ka jingstad her-suiñ ba ngi don mynta, yn ym pat lah ban ia her swari kai ia ki khuiñ ka bneng. Hynrei lada lah ban kham pynstet ia ka jingher jong ki roket haduh ban da ia jan ia ka jingstet her jong ka jingshai (3,00,000 KM. shi sekhon) te, ngin ia lah lehse ban leh kumta; ym tang namar ba ka la jur eh ka jingher stet ba poi kloï, hynrei, namar kan jia-long ruh kata kaba ki khot 'Ka Jingpynpyiar Ka Poi' (Time-Dilation). Ka-ei sha kane ? Ka dei ka aiñ jong ka Saian physiks (Physics) ba la lap nyngkong eh da u Albert Einstien bad ba la kynthup ha ka jingthoh ba donnarn jong u 'The Theory of Relativity'. Haba shim ia ka jingmut balyngkot, kane ka aiñ ka long kumne "Ka por, hapoh ka kali bneng kaba her stet la jan kat ka jingstet her jong ka jingshai (Velocity of Light), ka iaïd kham suki shibun eh ban ia ka long ha snieh pyrthei na kaba la pynher ia ka". Ka jingiapher jong ka por hapdeng u briew u ba her hapoh kaba kum kata ka kali bneng bad u uwei pat uba ap-khmih iaka na sla pyrthei, lah ban kheiñ da ka 'Formula' ba la khot 'Lorenz Transformation' kaba long kumne harum :

$$\frac{t}{T} = \left(1 - \frac{v^2}{c^2}\right)^{\frac{1}{2}}$$

t = ka por kaba iaïd ha u nongher bneng :

T = Ka por kaba iaïd ha u briew uba ha sla pyrthei

v = Ka jingstet (velocity) jong ka kali bneng,

c = Ka jingstet her jong ka jingshai.

Katkum ka tei ka 'Formula', lada ka kali bneng ka her ha ka jingstet kaba 99% ia ka jingstet her jong ka jingshai, tang 14.1 snem ka por ka la iaaid ha u nongher-bneng; katba ha u to u ba ap-khmih na sla pyrthei pat ka por ka la iaaid jin 100 snem ! Kam dei kaba phylla shisha ! Lada nang khampynstet shuh shuh lei te kan urlong kumba ong u David syiem "1000 snem ha pyrthei ki long tang shisngi hakhmat U Blei", namar lehse, ba U Blei U badonbor U iaaid U ieng da ka jingstet kaba kum kata ! Lada lah ban her da kaba kum ka tei ka jingstet, te lah eh ban ia swari kai sha u Khlur Alpha Centauri namar kan shim por tang 9 snem ka leit ka wan ia ki nongher-bneng. Bad ki lah lehse ban ia shem biang ia shibun ki lok ki jor, kiba ha-ing ha-sem ynda ki la wan phai pat; namar, ha ki ba ha pyrthei ka por ba ki nongher bneng ki la jah ka long tang kumba 61 snem.

Ki 'riewstad saian ki dang ia ngam shait shi shait ia ki par ba jylliew ka jingstad her bneng (Space exploration). Ki heh-jabieng bad ki khraw-pyrkhat ki ia mutdur shaphang kita ki 'Nuclear rocket' bad ki 'Photon roket', kiba lah lehse ban ia kot sha ki ba kum ki tei ki jingstet her. Ki da ia pyrshang ruh synia sngi da kumno ban saiñ-dur kum ia kita ki jaid roket. Hynrei ha kane ka rukom jinglong jingim huri-hura u khun bynriew ha sla pyrthei, ka long kaba artatien shibun eh ban ia kot sha kaba kum kata ka phang. Lehse, ka lah ruh ban long ba u 'Pud ka longbriew' hi um ai lad ia ngi ki briew ha kane ka don ka snam ban kot shata wat la ngi lah ban sngewthuh eh ne ioh-i ia ka phang : bad dei tang ka rngiew ka rwiang ne ka mynsiem (u moina ba la lait na ka ruh) hi kaba lah lehse ban ia kyrda doh-iap sha kata ka phang lada u Blei Trai Kynrad hi U mon. Kumta ngi ioh-i shai-kdar ba ki Hynñiew-trep ki Kpa Kulong jong ngi, ki dei ki blei ne ki khun

U Blei ba la wan hiar ha kane ka pyrthei na la ka Hima Bneng kat kum ka Hukum U Blei Trai Kynrad Nongthaw Nongbuh. Namar, wat lada ki khun bynriew kiba la hiar pateng na ki jingthaw jong U Blei ruh ki la lah ban jop katne ia ka haw-haw, katno tam lei ia ki khun U Blei ha bneng kiba kham stad bad kham palat shibun ia ka jingshemphang jong ngi ki briew. Ngin artatien lei ia kata

Ka jingmaian kaba ar ka dei ka longbriew. Ka-ei ka longbriew ne ka-ei ka jingim briew ? Kumno ka la mih nyngkong eh hangne ha sla pyrthei ? Kumno ka la roi ka la par lyngba ki pateng ?

Lada ngi kam kynti ba ki Kpa Kulong jong ngi ki dei ki Hynñiewtrep kiba long ki blei ne ki khun U Blei na bneng kiba la wan hiar ha kane ka pyrthei, ka jingkylli ka mih, ki-ei pat kita ki Kmie Kulong jong ngi ?

Ka jinghiar pateng jong u khun Khasi-Khara na ki Hynñiewtrep ka long kaba ngi baroh ngi ia kam kynti. Hynrei ka thymmei jong ki Kmie Kulong jong ngi ka long kaba jangan bha ban tih namar ngim don jingia-thuhkhana pateng ei ei shaphang jong ki. Hato, ki lah mo ban long ki poi-ei ki tam-ei kiba mih na ka ram-ew ne na ka Dieng ka Maw ne na ki mrad ki mreng kumba la bna wur-wur wer-wer da ka 'Theory of Evolution' ! Ne, ki dei ki khun briew ne ki khun blei kumba la ia-thuh ia ngi da ka 'Theory of Creation' kata "ki jingthaw jingpynlong U Blei" kumba la thoh ha ka Kitab Genesis jong ka Beibl ! Kam dei ka jingthmu jong nga hangne ban nujor ia kine ar jait ki jingngeit shaphang ka thymmei longbriew. Ka la biang lehse lada ka jingngeit u khun Khasi-Khara ka ia dei bad kano kano na kine ar.

Ki Khasi ki ngeit ba don u wei U Blei bad ki ong ia U, 'U Blei Trai Kynrad Nongbuh Nongthaw' Kumta ki Khasi ki ngeit ba U Blei U long U-ta U ba la thaw, ba la buh ne la pynlong ia ki-ei ki-ei baroh ha kane ka sla pyrthei. Ki ong ruh ia U ba u long 'U Blei Thawbynriew Buh-byrnriew' Kumta u Thawlang ka Jawbei bad U Ni U Kong naduh hyndai hynthai ki la ngeit ia ka 'Theory of Creation'. Lada ka long kumta ngin hap ban tohkit kiba kumno kita ki briew ia kiba U Blei U la thaw bad la buh ha kane ka pyrthei.

Kane ka ɪalam ia ngi sha ka kitab Genesis jong ka Beibl ha kaba ngi shem ia ki jingthoh bakhuid ki ba la batai shaphang ka jing-thaw jingpynlong U Blei Trai Kynrad ia ka Bnong bad ia ka Khyndew, ia ki um ki wah, ka khyndew ka shyiap, ki dieng ki siej, ki mrad ki mreng bad baroh ki kynja ba-im bakhih bad ia u briew de. Ka Kitab Genesis ka iathuh kumne shaphang ka jingthaw ia u briew :

'Kumta u Blei U la thaw ia u briew ha ka dur jong U hi, ha ka dur U Blei keiñ la thaw ia u; shynrang bad kynthai u la thaw ia ki. U Blei U la kyrkhu ruh ia ki bad U Blei U la ong ha ki, 'To da nangkha bad to da nangroi' (Genesis 1:27-28). Bad U Blei U la khot kyrteng ADAM ia ki ha kata ka sngi mynba la thaw ia ki (Genesis V:2). 'Te u Adam u la khot kyrteng ia la ka tnga, Ka im; naba ka long ma-Ka ka Kmie kiba im baroh (Genesis III:20).

Ka Im ka la ioh khun ia u Kain bad ia u Abel. Hadien ba la pyniap noh u Kain ia u Abel bad hadien ka jingbeh noh ia u Kain sha jngai, Ka Im Ka la kha pat sa ia u Seth bad kiwei de ki khun kynthai bad shynrang. U Kain ruh bad u Seth ki la ioh lok ioh khun kumjuh. Kumta u symbai briew (human gene)

u la roi la par. Ha kata ka por, ka Beibl ka iathuh ba la don tang u Adam bad Ka Im bad ki khun jong ki ryngkat bad ki mrad ki mreng kiba la roi la kha. Ka jingkylli ka mih, nangno u Kain ruh bad u Seth ki la ioh kynthei briew ban shongkha ? Don ka jingsuba ba ha kata ka por u briew ruh bad u, mrad, kiba ia im bad ia sah lang ha ka juh ka rukom kaba ia syriem, ki dang ia shong kha khleh; hynrei ym lah ban ong thikna ia kane. Hynrei Ka Baibl ka iathuh shuh, ka ong : 'Te ka la jia ruh mynba ki briew ki la sdang ban ia roi halor ka khmat ka khyndew bad ba la kha ia ki khun kynthei ia ki, ba ki khun shynrang U Blei ki la ioh-i ia ki khun kynthei ki jong ki briew ba ki ba bhabriew bad ki la shim ki tnga ia lade na kat kiba ki la i-bha. Te U Trai U la ong, U Mynsiem jong nga un ym ia leh bad u briew junom, namar ba u hi u long ka doh : la kumta ruh ki sngi jong u kin long 120 snem. Ki 'riewrad bah ki la don ha ka pyrthei ka kita ki sngi; bad hadien kata ruh, mynba kita ki khun shynrang U Blei ki la leit sha kita ki khun kynthei jong u briew bad ba ki la ioh khun na ki, kine kein ki la jia long kita ki briew ba shlur eh kiba ju long mynhyndai hynthai kiba donnam shibun (Genesis VI:1-4).

Ki-ei kine ki khun shynrang U blei ? Ki la dei ban long kiba don u Symbai-blei ha ki ! Ki lah ban long kita kiba ngi khot ki blei, kiba la wan hiar na bneng da ki kali bneng, na ka Hima U Blei. Kumta, ha kane ka bynta ka biang ban ong ba ki blei kiba wan hiar na bneng sha pyrthei da ki kali bneng ki la don ka plan ne jingthmu kaba skhem mynba ki la wan shane sha pyrthei. Ka lah ban long ba ki wan ban ai kyrpang ia U Symbai-blei ha katto katne ki kynthei-briew kiba la jied kumba la long ia ka Sarah ka tnga u Abraham mynba ka ioh ia u Isaak, ne ia ka kmie u Jeremaia ne ia ka Mary ka Kmie U Jisu Krist. Lehse dei na kaba

kum kane ka jingjia ba ki Ji w ki khot ialade 'Kiba la jied U Trai' (The chosen people of God) Bad lyngba ki khun ki ksiew jong kiba kum kita kiba la jied ba ki blei ki ai ki Ain ki Kanun kiba biang ban synshar ne pyniaid ia ka Long-briew Man-briew ha kane ka pyrthei Bad ruh ia ki jinghikai ba kordor ban kyntiew shajrong ia ka jingshai, jingstad, jingtip bad jingshemphang ha ki-ei ki-ei baroh, bad ia ka jingtip ba ia dei bad ki-ei ki-ei kiba kynja-blei ne kynja-bneng : ka jingtip-briew tip-Blei' ba ngi ong.

Namar kata, ki Hynñiewtrep ki dei ki blei ne ki khun U Blei Trai Kynrad, kiba la wan hiar na bneng sha kane ka pyrthei lem bad kiwei de ki paid ka bneng kiba la hiar ha kylleng ki bynta ka snieh pyrthei ha kiba ki khun ki ksiew u Adam ki la don. Ka jingwan hiar jong ki ha snieh pyrthei ka long kaba lada mang lypa Ka lah ban long ban tohkit ne investigate ia ka jingim ne jinglong u briew; ne ban ai jinghikai ia ki briew ha ka rep ka riang bad kiwei pat ki jait jingstad; ne ban wan ai ia U Symbai-b'ei kumba la kdew haneng. Hynrei ka la leit jia ryngkhat ba ki Hynñiewtrep ki la shim lok noh ia ki khun kynthei jong ki briew bad ki sah noh ha pyrthei ban kylla long 'ki kber khlein sner' katba ki Khyndaitrep kiba ap da ka kali bneng hangtei ha suiñ ki la leit phai biang sha bneng. Lada ka long kumta te ngi hiar pateng beit na U Blei lyngba ki Hynñiewtrep, kiba long ki khun jong U.

Namar kata, ngi don hok ban rwai :

*"Ki Hynñiewtrep ki Kpa Kulong,
Ki wan na Ri U Blei;
Symbai byneng baroh ngi long,
B'la bet ha sla pyrthei."*

Kumta hapdeng u paid babun ka sla pyrthei, u khun Khasi-Khara um dei u kynja ba mih ne hiar pateng tang na ki jingthaw U Blei ne na u symbai khleh briew khleh mrad; hynrei na u symbai ba kynja-blei. Kumta ngi don ka jingiadei kaba jan eh bad Ki Kha Ki Man Kulong jong ngi kiba don hangtei ha bneng. Kum ki blei, ki ia pyrkhath sngew synci eh ia ngi ki Khun-Kha Khun-Long kiba la hiar pateng na u Symbai-blei jong ki. Bun-bun ki khiep ki la ju phah jingiarap ia u hynñiew-trep ne u khun Khasi-Khara ha ka khim khait, haba u khmied la i khmat sha U Blei Trai Kynrad.

Kumba ka long, ngi la ioh pateng katto katne ka jingsngewthuh, ka jingstad, ka jingshemphang bad ka jingtip-briew tip-blei. Hynrei ngim shym la ioh pateng ia ka jingim bymjukut kaba pyniapher bak-lybak ia u briew na U Blei. Bad ngi dang long hi ruh ki kber khlem sner ha khum ka bneng. Ki kpa tvmmen ki jong ngi ki la ioh pateng ia ka jinglongshlur, ka jingkhilaiñ bor bad ka jinglonghok ba kynja bneng. Ki mawmynna bad ki maw tei-nam, ki 'riewshlur ka jaitbynriew bad ki riw-'radbah kiba kum u Bnang, ki la long ki sakhi bashai bha ia ka jinghiar pateng ka jaitbynriew. U Blei Trai Kynrad U ai ka Hukum kaba shai ba ngi dei ban kamai ia ka Hok ha kane ka jingim-doh ban dup ioh biang ia ka rngiew ka rwiang, ka rynieng-ryniot, ka Ksaw ka Kpong jong ka jinglong-blei ynda ngi la iap. Hynrei ia kane ngim leh bad ngi la lyndet noh na U Blei Trai Kynrad ka bneng. Katba nangiaid ki sngi ki por nangduh nangduh ka bor u Symbai bneng hapoh jong ngi. U Saw Shyrtong u la tyrwa ban krad lynti ia ngi sha duar U Blei Trai Kynrad bad ban bah ryndang ha khmat jong U na ka bynta ki jingbymhok ne ki pop ki jong ngi. Ia kane ruh ngim suidniew. Ha kane ka Juk ba mynta U Blei Trai Kynrad U tyrwa, lyngba U Jisu Krist, U Khun jong U, ban ai ka Jingmap-ei ia ki jing-

bymhok jong ngi bad ban pynioh pat ha ngi ia ka jingim
ba bymjukut jong U, da kaba ngi ngeit ia ka Khubor
Babha (Gospel) ba U la wan ban pynbna bad ban leh
ruh ia ki-ei ki-ei kiba U la bthah ia ngi ban leh ban ioh
long kiba ia bit dur bad ka rukom im (life style) ha
kata ka hima U Blei ha bneng.

*"Bynta ka Hima bneng ban ioh,
U symbai ba la sep,
Ka jinglong-Blei ba la duh noh,
U khun u hynñiewtrep."*

Ka long lehnoh-ei ia ngi ban kop sarong nalor tnum
ing ba ngi long 'ki khun ki Hynñiewtrep' lada ngim
shim ia ka ba ka long ka-ei ka-ei kaba kyntang bad
lada ngim nang ban ri kyndong khop iaka ha ki syrtap
ka dohnud jong ngi.

Tang ban ngeit ruh kam biang : ngi dei ban leh ruh
ia ki-ei ki-ei kiba U Blei U la bthah ia ngi ban leh ban
pynkyrpang ia lade bad ban ia khiih ia ksaid sha ka
kyrdan ka rukom im ba kynja blei; la ha ka pyrkhata
ka pyrdaiñ, ka ktien ka thylliej, ka kam ka jam bad
ka jinglong hok long sngur. U khun Khasi-Khara u la
duh noh ia la ki jingthoh jingtar ba ia dei bad kine
ki-ei ki-ei ha ka jingiaid-wir jong ki por ba-rim ba-jah.
Hynrei katba u lah ei u la nguid lyndet bad kine ki
sah ha ngi kum ki jingiathuhkhana pateng. Ka bha eh
ia ngi ban phai khmat sha ki jingthoh jingtar jong
kiwei pat ki para ka jaid ka khong ba ia tip ia riew
wur-wur wer-wer, kata ki Jiw. Lada ngin leh kumta, te
kane ka thymmei kan khiih-im hapoh jong ngi bad kan
long ka kynja ding ba rhern hapoh ki shadem jong ngi.
Bad kan pynlah ia ngi ban kiew shaphrang bad ban
kyntiew shalor ia ka Ri bad ka jaitbynriew. Lym
kumta :

*"Jar-jar ka Sngi phyrnai kan sep,
Ka Shakaina ki Hynñiewtrep
Ba shat na lyndet lyoh,
Ha krem Lamet ha krem Latang;
Ruma un kai u paid u shang,
Jingdum kan tap baroh."*

Nga kyntu ia ki para-ri ban ia pynshah-shkor ia ki sur "KA UMPOHLIEW KI UMJER BNENG" kaba tuid jar-jar ha ki krem ki kroh kiba jyndong bad jylliew jong ka Ri bad ka jaitbynriew.


U NONGTHOH

II. Ka Umpohlieu Ba-im

KA UMPOHLIEW

1. I Umpohlieu ba rit nga dei,
Jar-jar nga tuid ha sla pyrthci,
Ha Ri u soh u pai;
Ha por Pyrem bad Synrai-Tlang.
Na krem nga sei ki um ba bang,
Ban dih u ngap u lwai
2. U 'Tiew-tyrkhang na nga u dih,
U 'Tiew-dohmaw sha nga u khmih,
La khmat i-phuh i-phieng;
Na nga u 'Tiew-pathaikhubor,
Tong jingiwbihi jongka Myn-nor,
Kylleng ban pynsuhsieng.
3. Ia nga i sim kyllai dohdit,
I shapuloit bad phreit ba rit,
Na lum na them ki swait,
U sier u skei ba mareh thong,
Ki thapbalieh ba bun ki rong,
Na nga ki dih jahthait.
4. Syrtap ki mawsiang-pdang nga sam,
Thymmei jong nga jylliew ka ngam,
Ka Pukri-um ba-im;
Naduh ki sngi ka ksaw ka kpong,
Umjer byneng barieh ka long,
Ka juh na mynbarim.

5. Nangne nga kyrsoi khlem da jngut,
Ki sur ba rim nga iai kyn-ud,
B'la tem ha Ri ki blei;
Na duh ki sngi ka ksaw ka kpong.
Na duh ki por Hyndai Kulong,
B'la sawa ha pyrthei.
6. Jar-jar nga tuid halor ki wai,
Halor ki dew nga iaid pait-bah,
Nga kup ki rong phyrnai;
Katba ki noh na lum sha them,
Halor ki 'sai rupa nga tem,
Nga kyn-ud la jingrwai
7. Ki um ba sngur jar-jar kin hei,
Halor ki thapniang ksia kin per,
Ha Ri ki Lyoh phyrnai;
Hangta ka spah ki umja, oneng.
B'la buh tyngkai da ki kateng,
Kin ioh bynta kynai
8. Ale wan dih ko hep ba shing,
Ale wan dih ha ban da bial,
La ka khmat ruh to bta;
Ynda sha kliar u Lum phin kiew,
Phin sa pyrto, "Ko Umpohlieu,
Pha long jingim ia nga."



KA SUR BA-IM

9. Shar-shar Pha tuid halor mawsiang,
Na Pha ki dih kjat sngi ba sliang,
Ha sngi Pyrem ba shit;
U 'Nai-rupa ka miet ba dum,
Sa shibit shen ha Pha un sum,
Ban khuid ka syep ka tngit.

10. Hapoh ki krem ha rud lyngkha,
Pha tem ki sur ka Duitara,
Iap-bieit Mei-rad bapli;
Sngap kai i leit, wanphai im nang,
Khlem da iohmad ka um ba bang,
Hala ki lynghoh-kti.
11. U Nongshohnoh, u nongkamsniew,
U peitmat kdar shisien phylliew,
Ha um ba im jong Pha;
'Iad-thlen ba khor ka duh ka bor,
Kyndit bynriew u iaid sor-sor,
Ha Lympung jingshisha.
12. Nongleit jingleit sha ri ba rkhiang,
Shiteng lynti ka lap ka sliang,
Ki khohsiew u khynñiuh;
Sha Pha u par shikdoit ban dih,
Kum 'tiew iapthai kynsan u khih,
Shi khyllipmat u puh.
13. Katba ki lum ki them sangam,
Ka pneh mariang ka dait-thah slam,
Ha'syrngiew khriat ka Tlang;
Napoh shadem ka Mei ram-ew,
Jingsyaid Pha sei shalor ryngkew,
Pyn-um u thah ba lang.
14. Um ktieh ka Lyiur ka lyngkien sak,
Thymmei jong Pha ka lynsher ngak,
Hapoh um-saw Pha jah;
Kyrthep shipor ka ieng rasong,
Tang rang u slap, um-saw tyrkhong,
Hynrei ma Pha, Pha sah.
15. Pha long ka jingmaian bakhraw,
Jingdon ba rieh u Trai Nongthaw,

Ha jingim-doh b'la kah;
Ha khuiñ jong Pha nongrim ngan tei,
Nangta la sur myllung ngan sei,
Katba jingim dang sah.

16. Nangtuid ka Umpohliew ba-thiang,
Ban dih ki 'Rang, ki 'Thei ba sliang,
Ki pateng ba dang sah;
La sur ba syiang to patied jam,
Kylleng ka Ri sha ba Pha kam,
Sha duh ki Yrta-bah.

III. Ki Hynñiewtrep

PART - I

KA JINGKIENG SOHPETBNENG

1. Khadhynñiewtrep na Ri U Blei,
Ki pynkhreh la jingleit;
Ban her sha duh ki phang pyrthei.
Umier bneng ban synreit
2. Ban buh ban seng ka Hima Blei,
Hapdeng jingthaw ba im,
Ban jop ka bor u ksuid u khrei,
Ka jingsynshar ban shim
3. Shua ban rung hapoh Lieng-ksiar,
Hukum u Blei U ai;
"Ha Snieh pyrthei Hynñiew kin hiar,
Ha suiñ kin sah Khyndai"
4. "Ki Hynñiewtrep ha snieh pyrthei,
Kin kamai ia ka Hok,
Kin tip lade ba ki long blei.
Bad briew ban ia syllok."
5. Mynba danglung ka Sngi U Bnai,
Dang sdang kynih u Syiar,
Kumta ki blei ba swari kai,
Halor pyrthei ki hiar.

6. Ka Lieng-ksiar lydui ha suiñ ka sdien,
Pynnoh ka Jingkieng-ksiar;
Nangta shaduh khyndew sha tbian,
Ki Hynñiewtrep ki hiar.
7. Ka Maia Blei kum sohpelbneng,
Arsut bad ki ka noh;
Pyrthei ka ai jingshai kylleng,
Lyngba syrtap ki Lyoh.
8. Muhor jong ka dei ka Hok,
Bad jingtipbriew tıp-blei;
Pyrthei bad bneng ban ia syllok,
Ha jingialong kawei
9. Ka long ka Dak ka Hukum Blei,
Halor Kí Hynñiewtrep;
Ban ioh leit phai sha bneng shatei,
Ynda jingtrei la dep.
10. Kyrdon jing-jam jong ka la thew,
Da jinglong-hok long-blei;
Shijam ha ka na sla khyndew,
Shi-kraiñ ki hok pyrthei.
11. Ka Sngi U Bnai kum shi-para,
Ha suiñ ki ialeh kmen,
Kunata ka pyrthei shong basa,
Na bneng ka ioh jingtingen
12. Katba na bneng ka Hok ka hiar,
Ha pyrthei ieng rasong;
Ki 'er-pyngngad ka Aiom-ksiar,
Ki beh kylleng sawdong.
13. Ki Ksuid ki khrei ki ia peit-kai,
Ki Hynñiewtrep syn-ei;
Ka Hok katno ki ia kamai,
Ban kot ban kiew shatei.

14. Katno ki bat ka Hukum-blei,
Hapdeng u mrad u bried;
Lade kim shah ban iw pyrthei,
Sha bneng ioh duh leit kiew.
15. Khadduh ha shkor Ki Hynñiewtrep,
Ki leit ban pynsawa;
'Jingkiew jinghiar man miet man step,
Katno jing-i saja'
16. Ki 'per tyrso jyrngam pyrthei,
Ki kdew ban pynthame;
'Yn leh aiu sha bneng sha-tei ?
Ka bit ka biang hangne.'
17. Kumta katba ki Khyndaitrep,
Ki ap hangtei ha bneng;
Ki Hynñiewtrep ki shah tyллеp,
Jingsneng narum naneng.
18. Ka Delila ka 'thei bhabriew,
Samson ba khelaiñ ka bor;
Shikdoit ia jingieit ka phylliew,
U duh i'u shñiuh ba kdor.
19. Ka Waitlam ksuid ki kieng ki deng,
Ki mait ki ksai ka Hok;
Tmak dkut 'sai-ksiar 'Kieng sohpetbneng,
Thapti ki ksuid Dujok.
20. La dkut ! la dkut ! ki ksai ka Hok,
'Kieng Sohpetbneng la jah !
Rasong ka ieng ka pop Dujok,
Khunswet ka Hok ka sah.
21. Khunswet ruh sah ki Hynñiewtrep,
Halor ka snieh pyrthei;
Nangtei na bneng ki Khyndaitrep,
Ki khongoid i-synei.

22. Ah ! ko 'Kieng-ksiar ka Hok bneng,
Shano kyrdon jong pha ?
Ki Hynñiewtrep ki sahngheh dheng,
Kumba phohsniew ruma.
23. Suki Lieng-ksiar sha suiñ la rah,
Ka pyrthei sha poh jlang;
Ki Hynñiewtrep ha jingkynjah,
Ki jaw ki ummat kthang.
24. Halor ki 'per tyrso baroh,
Ka Sngi byrhuiñ ka saw;
Ka Paradais ba la duh noh,
Ka sah ha jingkybmaw.
25. Nangne ngi sei ka Daw ba ih,
Jong ka Long-briew Long-blei;
Bad ki syrtap ka Daw ba riech,
Ka jinglong-ksuid long-khrei.
26. Ki Hynñiewtrep Ki Kpa Kulong,
Ki wan na ri U Blei;
Symbai bneng baroh ngi long,
B'la bet ha sla pyrthei.
27. Katba pyrthei ka pdiang sngewbha,
Ia Jingkieng Sohpetbneng;
Ki Ksuid ki khrei kim ai jaka,
Ka Hima Blei ban seng.
28. Shisien b'la hap ha jingpynshoi,
Ki ksuid ki la teh mraw;
Katba Hynñiewtrep ki nang roi,
Ka pop ka nang pam-daw.

29. Hok bad jingsuk ki her sha bneng,
Ka Ri ba shong U Blei;
Ka pop bad jingjynjar kylleng,
Ki roi ha sla pyrthei.
30. U thied u phniang u Blei na bneng,
Suki u lyngaid u sep;
Ha snieh pyrthei u par kylleng,
U khun u hynñiewtrep
31. Bun-bun na ki, ki buh jingthoh,
Halor ka Dieng ka Maw,
Hynrei u khun khasi ba proh,
U buh ha jingkynmaw.
32. Haba ia Pha nga poi kynmaw,
Nga her sha ri ba jngai;
Ummat rupa na nga ki jaw,
Halor ki sur jingrwai.
33. Katba hangne nga ɿaid sakma,
Pha kyn-ud ɿa ki shkor,
“Kieng Sohpetbneng to ɿaɿ sawa,
Sha ki wei pat ki por.”

*“Namar kata ka jinglong trai shnong
jong ngi ka long ha bneng.”*

BEIBL (Phil · 3 20)

PART - II

HA SYRNGIEW KA DIENGIEI

1. Ka Sngi ba tyngshaiñ ha suiñ bneng ?
Pyrthei ka ai jingshai kylleng;
Ynda ka sep ka jah noh jar,
Kı ksai jingshai ki dkut noh phar;
Jingdum ka mih na poh ram-ew,
Ka tap halor ka sla khyndew
2. Khana kumta ngim ioh pateng ?
Ynda la dkut 'Kieng Sohpetbneng ?
Kı Hynñiewtrep ki khynñiuh that .
Sha bneng kumno yn ioh kiew pat,
Diengiei ka mih napoh Ram-ew,
Ka san halor ka sla khyndew
3. Ynda la dkut 'Kieng Sohpetbneng,
'Kieng-ksiar ka Hok nangne la weng,
Hıma ki ksuid napoh Ram-ew,
Ka san halor ka sla khyndew,
Ha dur ka dieng ba ngiew kynsha,
Ba sah kynmaw hala yrta.
4. Ka Dicng ba ngiew, dur ba kynsha;
Ka ngam khyndai pateng ñiamra;
Tynrai jongka shapoh Nurok,
Ka jingkieng-ksiar ki ksuid Dujok;
Ha ki 'Nat-bah ba dum ba ngen,
Hangta u riew u 'Seiñ-Tymmen.

5. Ki sur ba ngiew na ka ki per,
Synñia bad sngi ka beh ka lyer;
Kum ka syngwai halor ka thwei,
Ba khring ba tan khlem tip ei-ei;
U ba rieh tngen hapoh jong ka,
U hap khyndai pateng ñiamra.
6. Katba nangiaid ki sngi ki snem,
Ha ri u lyoh la khlieh ka dem;
Ki sla ba rben kim tlor kim stai,
Ha lyiur, ha tlang, pyrem, synrai;
Ki tnat ba dum ki pyiar sawdong,
Ka Sngi u Slap, ki bat sha jrong.
7. Halor ki tnat u rieh u Dngong,
Ha trai ki rieh ki puri-iong;
U kiew u hiar u Kohtympan,
Katba nang tbeh ka Ding Soitan;
Nangne ki her ki thapbulong,
Hapdeng ki briew u ksuid ban shong.
8. Katba nangiaid ki sngi ki por,
Ka jinglong-blei ka nang synjor;
U hynñiewtrep u nang saphriang,
Ka sdang ban iar ka rep ka riang,
Hynrei Diengiei ka kah syrngiew,
Rieh tngen ka Pop ha dohnud briew.
9. Napoh mynsiem ka pop barieh,
Ka kiew shaduh ka maloi khlieh;
U khun bynriew u duh ka maiñ;
Bad ksuid ki khrei u sdang ia raiñ;
Ka jinglong-blei ka sdang her krad,
U briew u sdang ban kylla mrad.
10. Bun bun na ki ki kylla ksuid,
Ka khlieh lajong ki khi lai-nuid;
Ha trai Diengiei ki leit ban shong,

Ban wad jingstad ki puri-iong;
Hangta ki law la ki jaiñspong,
Nangta ki ieng ka kren byrtong.

11. Lyngba jong ki u 'Seiñ-tymmen,
Hapdeng u briew u leit ban kren;
U sei ki nia, u woh ki daw,
Ban klet u briew i'u Blei Nongthaw;
Ban nguh ban dem i'u ksuid i'u khrei,
Shi khrum ka bneng hapoh Diengiei.
12. Ynda ha suiñ u khih 'lar-en,
Hapoh Diengiei ki leit rieh tngen;
Khyndai pateng ñiamra ki hap,
Nangta ki mih ha dur 'Suid-iap;
La khun la ksiew ki leit ban thlia,
Ha ñng ha sem sa pang sa jhia.
13. Lyngba jong ki, U 'Seiñ-tymmen,
Ha pdeng u briew U leit ban kren;
Ka nguh ka dem ba kan wandur,
Ka kñia ka khriam ban long dustur;
Halor ka maw kan kem ka Lar,
Ka Dak ka shin yn i shai kdar.
14. Kumta u khun u hynñiewtrep,
Hapoh jingdum u shah tyllep;
Ki ksuid ki khrei ki la teh-mraw,
Na ñng sha lum ka dap ka Daw;
Jynjar u im u khun bynriew,
Katba Diengiei ka kah syrngiew.
15. Hangne ka tuid ka pop ka sang,
Hangne ruh saiñ ki jaid jingpang;
Syrngiew jongka halor madan,
Ka shon ka shap ka jingiap-thngan;
Sha jrong ka san na sla pyrthei,
Sha jngai ka ran ka Hima Blei,

U 'SI KYRTONG BAD KA TYNGAB

16. Namar jingshai jingsyaid ka Sngi,
Ka sla khyndew kam ioh kynti;
U kba u krai u kylla stait,
Ka rep ka riang ka shu jah lyngaid;
U hynñiewtrep u khynñiuh that,
Sha bneng u khmied u jaw ummat
17. Katba nangjaw ki khlur ummat,
Shajngai ki her ki jing pyrkhat;
"Ko Jingsuk bneng! Pha don sha-ci ?
Jynjar nga im ha sla pyrthei"
Ha Dieng ha Maw u ud u nam,
'Jing-isnei Blei', u pyrta jam
18. U Blei na jrong U isynei,
I'u Symbai bneng ha snieh pyrthei;
Kumta Basan lajong u phah;
Ka Khubor blei shu briew ban rah;
"Shi symboh khaw, shi khiew kan shlei,
Wat leit rieh-tngen hapoh Diengiei."
19. U 'Si kyrtong nongrah 'Tien-blei,
Ha shida ngun u iaid marwei;
Shi khlieh u kit ka Khubor bneng;
Ban long jingkmien i'u briew kylleng;
'Er-iong ka beh halor Diengiei,
Khywin Hima ki ksuid ki khrei.
20. Nalor Diengiei ka Tyngab iong,
Lynti ka tan i'u 'Si kyrtong;
Tyrsim ka ksam halor syntai,
Nangta ka sei ki sur jingrwai;
U 'Si kyrtong Basan u Blei,
U sngew phuh-mat hala marwei.

21. Ynda Tyngab ka sdang it-ksi,
Na kaba stet, u iaïd suki;
Ynda ka twad sha ki tyngkhap,
Ban skiah ka ksi, ban phut ka dkhap,
U 'Si kyrtong u sei hi blep,
Khubor byneng ha khlieh b'la thep

- 22 La jop ! la jop ! shiteng ka Thma,
Ka Tyngab iong ka rykhie sngewbha.
U 'Si kyrtong u hun lyngngai,
Ha jingsngewbha ka doh hai-hai;
"Ka jingjahdait ba kat kata.
Tang ka Tyngab, lok ba shisha "

23. (Ka Delila ka 'Thei bhabriew,
Shikdoit jingiet ka ia phylliew;
Samson ba khlaïñ u duh ka bor,
Ynda la khap i'u shñiuh ba kdor;
Katba ma ka rymmuñ ka wiat,
Hapoh 'liew-lep marwei u liat)

24. U kyllon pding, u thiah thait jai,
Katba Tyngab ka siaw ka rwai;
Nangta ia u ka sneng ka bthah,
Khubor aiu u dei leit rah :
U klet Khubor ba phah u Blei.
B'la shoh-tvndep u ksuid u khrei

25. Hapdeng u briew ba ap 'Tien-Blei,
U 'Si kyrtong, 'Tien-Ksuid u khlei;
"Ba phin dap bam, ban kdang ka kpoh,
Shi-shang shet ja, shi-khiew shet doh",
Nangta u sei ka ñia sait hok,
Nang pnah u thylliej, heh ka thoh.

26. U khun bynriew u nang tyrkhong,
Da ngeit jingbthah u 'Si kyrtong;
Ka Shat ka Kheïñ ka ioh nongrim.

Ka Kñia ka Khriam ka nang khie im;
Nang jngai u briew na Duar Blei,
Nang iar hima u ksuid u khrei.

KA PHREIT BAD U KHLA

27. Ynda la kut ki lad ki iar,
Ynda u ksuid ha trep u hiar,
U Symbai bneng ba sah tyrkhong,
Kawei u rai, long katba long :
'Diengiei ka dei ban kyllon kram,
Mat tuid ka syep, mat jaw ka snam.'
28. Kumta tylli kawei ki ieng,
Atiar ka Hok ki kieng ki deng;
Ha dur ka wait, u sdie ba nep,
Dang step ki mih na la ki trep :
Baroh shisngi ki minot thop,
La bor jingkhlañ ban sei ki kop.
29. Hynrei la shai ka dien ka juh,
La sop phad-lung ka dak b'la puh;
Kumta shi kumta man ka por,
U hynñiewtrep u duh ka bor.
Baroh baroh ki ksuid ki khrei,
Ki ia rykhie beiñ nador Diengiei.
30. Khubor byneng kum jingphohsniew,
Sawa ha shkor u khun bynriew;
Lyngba ka Sim barit Ka Phreit,
Synñia-ia-shai ba thiah ia peit;
"Phad-lung ka sop, ba jliah u Khla,
Ha por ba dum shiteng synñia."
31. "Sharai, phirai ho ! hynñiewtrep :
Pyn-ap ki wait ki sdie ba nep."
U hynñiewtrep u risa shait,

U puh u daiñ, u trei khlem thait :
Ki ksuid ki khrei baroh ki jlew,
Ia ki la jop ka Phreit beh iew.

32. Katba u Sdie u dang ai jem,
U 'Seiñ-Tymmen u rykhie iam-rem;
Arsut u noh sha la Hima,
Shapoh Khyndai pateng Niamra;
Kumjuh ki ksuid bad rit bad heh,
Shata ban hiar baroh ki khreh.
33. Kyndit Diengiei ka kyllon jraiñ,
Na sahit bneng ka Sngi tyngshaiñ;
Sa shisien pat ka bneng ka jan,
Dujok arsut sha jngai ka ran;
Ka Jingkieng-ksuid bad Jingkieng-blei,
Ki jah nalog ka snieh pyrthei.
34. Ki ksuid ki khrei ba sah sha dien,
Ha khlaw ha btap ki rieh ki sdien;
Ki puri-iong, ki puri-lieh,
Ha lum ha wah ki shad mastieh;
Mynkoi U Jom ban poi kim lah
Ha snieh pyrthei bad briew ki sah.
35. Kumta Diengiei la jah sha rngai,
Halor ryngkew khlem sah symbai;
Hynrei ka san ka kah syrngiew,
Hangno ba don ka dohnud briew;
La rit la heh, kam pher ei-ei,
Hangta un rieh u ksuid u khrei.
36. Kumta u briew ha snieh pyrthei,
Um dei u ksuid lymne u Blei;
Hynrei kat sha ba dem ka Mon,
U wei na ki u dei ban don.
Ka Madan thma ka Pop ka Hok,
Ka Hima-bneng bad ka Dujok.

PART - III

HAPOH JINGDUM KA MIET BA - JLAN

1. Ka miet, ka sngi, u pud u sam,
Na wei sha wei shua ban kam;
Lai sien kynih u syiar;
Ha sngi ba slap ba dum ka lyiur,
U syiang-ryndang u lam ka sur,
Suiñ bneng ka phngaiñ hi kdar
2. Ka Dak ka Shin ba kumno sha ?
Na duh mynno ka long ka jia
Halor ka pneh mariang !
Dienjat u hynñiewtrep ngan tieh,
Hapoh u Shviap ka Por ba rieh,
Ki um ngan pun jingkieng
3. Diengiei mynnor la jah sha rngai,
Halor ryngkew khlem sah symbai;
Yn tieng yn khuslai lei ?
Hynrei ka san ka kah syrngiew,
Hangno ba don ka dohnud briew,
Ban rieh u ksuid u khrei.
4. Ka Sngi ka mih, ka Sngi ka sep,
Ki khun ki ksiew ki Hynñiewtrep,
Ki sngew ia jinglaitluid;
Hynrei kim tip ka dei ka ei ?
Ka Hima-bneng ha snieh pyrthei !
Ne ka Hima ki ksuid ?

- 5 Ka Sngi ka mih, ka Sngi ka sep,
Ha ki lyngkha u hynñiewtrep,
Halor ka snieh pyrthei;
Ki thapniang ksiar ka jinglaitluid,
Ki bud lynti ba lam u ksuid,
Sha syrngiew ka Diengiei.
- 6 Katba ki pateng ki nangiaid,
U khun bynriew u iap buaid
Ahor ka pop ka sang;
Syrngiew ka hok ka phet sha jngai,
Ka pop ka sang ka roi kyrhai,
Ym don ba lah ban khang
- 7 U Blei Nongthaw nangtei na bneng,
U i ia Hima ksuid b'la seng,
Halor ka snieh pyrthei,
Ka Khmat byneng Ka bitai lep,
Ban i i'u Khun ki Hynñiewtrep
Bret noh ia jinglong blei
- 8 'Jingtim', la rai ha Khet byneng,
'Jingtim', ha snieh pyrthei kylleng;
U mrad ruh bad u briew;
Ka snieh pyrthei kan khuid ka pop,
Hapoh ki um kan ngam jyllop,
Ki um ki ba jylliew
- 9 Halor suiñ bneng ki dak ki paw,
Ka Sngi phyrnai suki ka saw,
Ka jah sha lyndet lyoh;
U khun bynriew ha snieh pyrthei,
Um lah sngewthuh ka bor U Blei,
U ong ba bam hynroh
10. Katba nangiaid ki sngi ki por,
Ki syrtap lyoh ki kiew shalor,
Syrtap u lyoh ba rben;

Na lyndet lyoh ka Sngi u Bnai,
Kim lah ban sam ban ai jingshai,
Pyrthei ka dum ka ngen.

11. Kumta ka Sngi ba khuid sotti,
Ka lah ban peit ia jing-ijli,
Ka pop bad jingbyrsieh;
Sha krem Lamet sha krem Latang,
Sha jngai na pdeng u paid u shang,
Marwei ka leit ban rieh.
12. Jingpynhiar-kput U Blei, la sdang,
Halor duwan ka pop ka sang,
U khun bynriew um pei,
Ha jingkyn-oi ka Ramshandi,
(Ki ia rykhie bein Noah bapli)
Napoh syrngiew Diengiei.
13. Khadduh u khun Khasi ba proh,
(Ki khun ki Hynñiewtrep baroh),
U sngewthuh ia jingma;
Lada ka Sngi kam mih-paw shuh,
Jingim baroh kan poi sha Ruh,
Ban jot junom hangta.

KA DORBAR - BLEI U LAIPHEW DOH

14. Kumta u khot ka Dorbar - blei,
Jingthaw ba im ha snieh pyrthei,
Ban wad ka lad ka iar;
U briew u mrad, ka sim ka doh,
Baroh ki mih na krem na kroh,
Ha Lympung ban ia hiar.
15. Namar b'u khun u hynñiewtrep,
Hapoh ka pop la shah tyllep,
I'U Blei um nud ban peit;

- Ka Dorbar blei ka pynkupbor,
 Kan jied u no ban rah khubor,
 Sha Duar Blei ban leit.
16. Khadduh khadwai u 'Iar-lymboit,
 Napoh kyndong u ieng hi joit,
 Ka jingkitkhlieh u shim;
 Ban bah ryndang i'u khun bynriew,
 Ha Duar Blei un leit ban kiew,
 Ban pyllait na jingtim.
17. Ia Ka Mei 'Ngi ban wallam biang,
 Na krem Lamet na krem Latang,
 Ka dak ka Jingmap-Blei;
 Laisien laiwat un sa kynih,
 Napoh jingdum ka Sngi kan mih,
 Na bneng kan paw pyrthei.
18. U briew u mrad, ka sim ka doh,
 Baroh ki ai ka jingiaroh,
 I'u khun lymboit lymbiang;
 U briew u ai ka kup ka phong,
 Ka riam ka beit, u saw shyrtong,
 Bad kyrdan ba ia biang.
19. U Syiar u paw ha Duar Blei,
 Ha dur sngewrit, dur i-synei,
 U pynshah la ryndang;
 U Blei ba sbun jingieit ba dap,
 Ka pop u briew U kloï ban map,
 Da bat ia Ka Jutang.
20. 'U briew un mane tang I'U Blei,
 Kat ba dang im ha snieh pyrthei,
 Un klet i'u ksuid u khrei;
 Hukum kyntang ba Myn-nyngkong,
 Hala Dohnud u iai teh-song,
 Ban poi sha Ing U Blei.'

21. 'Ha pang, shitom bad jingjynjar,
Ka Lait ka Let ha Iing ha Bar,
Jingmap Blei un kyrpad;
H'u ksuid u khrei um bit ban kñia,
U Blei Nongthaw un ker un da,
Da duai da phirat'
22. 'Ban lait ka Sang, ban lait ka Ma,
Un tip la ka Long-kur Long-kha,
Iktiar u Kñi u Kpa;
Thawlang, Iawbei, ki Longshua,
U Ñi u Kong, Mei-kha Pakha,
Un kynmaw shi-yрта.'
- 23 'U Saw-Shyrtong un bah ryndang,
Ban sah ka Niam ban neh Jutang,
Hapdeng u Briew - U Blei;
Lyngba ka Dak h'u Saw-shyrtong,
U Blei Nongthaw na bneng na jrong,
Un ai ka jingmap-ei '
24. U Saw-Shyrtong na Duar Blei,
U hiar halor ha snieh pyrtnei,
Ryngkat bad ka Jutang;
Kum Moses hiar na Lum Sinai,
Wanrah khubor U Blei ba ai,
Hala u paid u shang.
25. Hapoh jingdum, u briew u mrad,
Haba jingthaw kim poi pyrkhat,
Shisien kynih u syiar;
Ka shkor ba iap ka kyndit thret,
U briew u mrad u mareh stet,
Hapoh Lympung u hiar.
26. Arsien kynih ka bneng ka dum,
U Laiphewdoh u ia ap shrum,
Ha Lympung Dorbar-Blei;

Lai sien kynih, jingdum ka khih,
Halor suiñ bneng jingshai ka mih,
Ka thaba ha pyrtnei.

27. Ha jingkhoh-iei u Rang-kynih,
Na lyndet lyoh ka sngi ka mih;
Shad-kmen u laiphew-doh;
Ka Jutang-Blei ki pdiang sngewbha,
Nangta ki ieng ka rwai risa,
I'U Nongthaw ban iaroh.
28. Ka Jutang-Blei ha dohnud briew,
Kan rat Diengiei ba kah syrngiew,
Ba rieh u ksuid u khrei;
'Kieng Sohpet bneng ba la ot noh,
Sa shisien pat la teh syrdoh,
Ban poi sha ųng U Blei.
29. Ynda jingtim na bneng ka hiar,
Ka Jutang-Blei u teh 'sai-ksiar,
U buh hala shadem;
Katba ki iwei jyllop ki ngam,
Ki um jingtim u lait ban kam,
Ka Jutang-Blei ka skhem.
30. Kumta u khun Khasi ba proh,
(Ki khun ki Hynñiewtrep baroh),
U bat ka Jutang-Blei;
Ha ka u seng ka Niam-Rukom,
Ba sah kynmaw junom junom,
Halor ka snieh pyrtnei.

PART - IV

HALOR KI LUM BA JNGUM

1. Naduh na trai 'Kieng Sohpetbneng,
Ka 'Per Eden hyndai b'la seng;
Haduh ha khuiñ, ha trai Diengiei,
Ka ktem ba rieh u ksuid u khrei;
Syrwet Dienjat u hynñiewtrep,
Shapoh la ngam, jylliew la tep.
2. Ha Ri ba tuid ki um jingtim;
Ka Jutang-Blei Khasi u shim;
Nangta u phet khlem kylla dien,
Lyngba ki um basaw basien;
Nangta u snoh ha kliar ki lum,
Ba san shajrong nalog ki um.
3. Suki u it ki jaka rieh,
Shaneng sharum kylleng u krieb;
Ha lum sha lum u pun jingkieng,
Ha jingkyn-ud ki sur ka mieng;
Hala mynsiem u sngewthuh shai;
Ka Ri jong u ka don sha jngai.
4. Hala mynsiem u i shynna,
Ka Ri ba Blei u la buh lypa;
'Kum Ri Kanan u khad-ar jaid,
Na jinglongmraw ba la ioh lait'
Kumta u ieng ka it hima
Ha lum ha thor, ha ki pyntha.

5. Pateng ki leit, pateng ki wan,
(Lynti kyllaiñ sha Ri Kanan);
Halor ki 'per soh 'per syntiew,
Um juh ban shong ha ri ki briew;
Kumta u her sha ri ba jngai,
Ban wad ka ri u soh u pai.
6. Khadduh u poi ha trai ki lum,
Sawdong jong ki ba ker ki um;
Na jngai u peit, katno i-ieit,
Katba nangjan u nang iap-bieit;
Kyndit na Bneng u hiar u lyoh,
Ia kliar ki lum ba jngum u doh.
7. Khlek, u kynmaw 'Kieng Sohpetbneng,
Jingkieng byneng U Blei la weng;
U kyndit thret kumba phohsniew,
U peit-mat kdar, u ong wei-briew :
"Hangne ka shat ka Shakaina,
Hangne ngan seng ka It-Hima".
8. U sdang ban prat ban mait lynti,
Na phang ka liang ba mih ka Sngi;
Halor ki riat ki sharing-lum,
Ki them ki lyhuh ba tuid ki um;
Na trai ki kshaid ba noh rymphum;
Shaduh sha kliar ki lum ba jngum.
9. Nangta u skud u pud u sam,
Ban long ka Hima bad ka Nam;
Baroh arliang, shatei shathie,
Ki um ba lang ki wah ba kie;
Ka wah Rilang na sha sepngi,
Na mihngi pat ka wah Kupli.
0. Ka Ri kynti lajong u kam,
Ha pneh ka Bri u tur u ngam;
Nangta u jer ki lum ki wah,

Kyrteng sah-nam barim bajah;
Ban sah kynmaw ha khun ha ksiew;
Pateng-pateng u khun bynriew.

11. Kumta hapteng ka Ri ki ieng,
U LUM DIENGIEI bad SOHPETBNENG
Ban sah kynmaw ia Jingkieng-ksiar,
Ki Hynñiewtrep na Bneng ba hiar;
Bad ka Hima u ksuid u khrei,
Ba kah syrngiew ha sla pyrthei.
12. Sawdong kylleng ki lum ki wah,
Rukom kyrteng, u sin u pah;
Aiu halor ka pneh Mariang,
Un khot un jer ka Ri bathiang ?
"Naduh Rilang haduh Kupli,
Kane ka dei ka RI KHASI".
13. Ko RI KHASI ri jingphohsniew,
Ko Ri ba tuid ki umpohliew;
Na ki, ki khun ki Hynñiewtrep,
Kin dih jah sliang ynda la syep;
Ynda shit lyhop ha sharing lum,
Halor ki wah rupa kin sum.
14. Ban ieng rangbah u briep ha tbien,
U Blei na jrong Un kyrshan dien;
Halor Jutang baneh junom,
U seng ka Niam ba bat rukom;
I'U Blei Nongthaw u nguh u dem,
Ha lum ha wah, ha ñng ha sem.
15. Ka pang-shitom, wai-wai wiah-wiah;
Ka shat ka kheĩñ ban tohkit bniah;
Jylliew u ït ka Daw tynrai,

Ka dei ka Sang ne dei ka Brai;
Ha ki sapied ka kup ka Lar,
Ka Dak ka Shin u i shai kdar.

16. Nangta u dem ka duwai Blei,
Ka Lait ka Let ban iohmap-ei;
Ban da ban ker n'u ksuid n'u khrei,
Ban ioh im suk ha sla pyrtnei;
U Saw-shyrtong u hap ryndang,
U Blei u map ka pop ka sang.
17. Nangta u seng ka Longbynriew,
Halor Nongrim b'la tieh jylliew;
Ka Kur ka Jaid, yn kheiñ na-ei ?
Ka hiar pateng, Shynrang ? Kynthei ?
Kumno kan neh ka Kur ka Kha !
Kumno yn lait ka Sang ka Ma.
18. Ki Hynñiewtrep ki Kpa Kulong,
Sha bneng ki ieh bynta lajong;
Hangne halor ka snieh pyrtnei,
Kim don bynta ne hok ei-ei;
Na liang jong ki ngin hiar pateng ?
Bynta jong ngi ka don ha bneng.'
19. Hynrei sha bneng ym lait ban kiew,
Ka Doh ka Snam bad ka Longbriew;
Lada ngi bat ka Jutang-Blei,
Ynda la iap ngin poi shatei;
Katba dang im ha snieh pyrtnei,
Ngin ioh pateng ki hok i Mei.
20. Ka Hukum Blei ba myn-nyngkong,
Ia Hynñiewtrep ha bneng ka long —
"Mynba phi don ha sla pyrtnei,
Phim bat ia Jingtip-Briew tip-Blei";
H'u hynñiewtrep ka iai pyrtta,
"Bat ruh ia Jingtip-Kur tip-Kha."

21. Thawlang, Iawbei, ki Longshua,
Ka Bei ka Pun, u Kñi u Kpa;
Ha khia ha shon u ud u nam,
Japha Jasiang u ai ban bam;
Ka Khor ka Khriam ba i shongkun,
Mawbah u thep, mynsiem pynhun.
22. Kumta halor ka Jutang-Blei,
Ka RI KHASI la seng la tei;
Ka Niam-rukum, ka LongBynriew,
Hangne kin san kin phuh syntiew;
Ban ieng rasong ha snieh Pyrthei,
Ka JaitBynriew tip-briew tip-Blei.

PART - V

U SYMBAI BA LA SEP

1. *Ki Hynñiewtrep ki Kpa Kulong,
Ha bneng ki ieh bynta lajong;
Na liang jong ki ngin ioh pateng,
Bynta jong ngi ka don ha bneng;
Katha dang sah ha snieh pyrthei,
Ngin ioh pateng ka hok i Mei.*
2. *Kumta u khun Khasi-khara,
U don ar hok ne ar bynta;
Bynta I Pa ha Ri U Blei,
Bad jong i Mei ha sla pyrthei;
Hangne ia Longbynriew la seng,
Nangne ka san ka Longrynieng.*
3. *Ka Hok lada un nang kamai,
Ka Jutang Blei un bat tyngkai,
Wiang-rnong jong u kam sah nong-ra,
Ka Maia blei kan shat hangta;
Ha Ka la saiñ ki jor byneng,
U Symbai bneng ban roi kylleng*
4. *Kam dei syrngiew ka Hok i Pa
Na bneng ba shat halor nongra !
Ba pyn phalang ha snieh pyrthei
Ha Dur u Briew, Ka Maiñ U Blei !
Naduh rympei ba pynphyrnai,
Kylleng sawdong ba ai jingshai !*

5. Kumta u khun u hynñiewtrep,
Bynta sha bneng un ioh khlem pep;
Khyndiat shibun, babha basniew,
Ka shong shimet ha u wei briew;
Ka Hok hangne u kamai lypa,
Sha bneng ban bit ban ioh bynta.
6. Ka bor, burom, bad spah pyrthei,
Ki Kyndang-kwah ka Reng i Mei;
Mynsiem pyntlot, ka Doh pynkhlain;
Kyntiew ka Rongphong, pat ka Maiñ.
Arsut syntuid ka Burom Kpa,
Artet ka kiew ka jingthala.
7. Ka bor, burom bad spah pyrthei,
Ki Kyndang-kwah ka Reng i Mei,
Hapoh dohnud kim ai jaka,
Bynta sha bneng ban kamai lypa.
U Symbai bneng um ioh suhthied,
Dewmet marwei ka shong sah-jied.
8. Ah ! Ko Dewmet ba sah khynraw,
Phan leh aiu ia u 'lap-praw ?
Ka bor, burom bad spah jong pha,
Ki kylla long jingshet-kylla;
Kum jingphohsniew ka 'thei samla,
Ba shu jah noh shiteng synñia.
9. Lada pha hun ban shong marwei,
U Symbai bneng un shu sep-ei;
Bynta sha bneng phan sa duh noh,
Junom ia pha un tap u lyoh;
Ka Shakaina ki Hynñiewtrep,
Jylliew kan ngam hapoh ki kpep.
10. Hapoh syrngiew u lyoh ba dum;
Jingshai kin wad shaneng sharum;
Ka Maia blei kim i ia Ka,

Kin mane dem ki blei thala;
Ki kyndang-kwah ka Reng i Mei,
Kyrda 'rap-jot ha sla pyrthei.

11. Bunsien marwei nalar ki lum,
Nga ieit ban peit ki thwei ba jngum
Ki dew phyrnai khrik-khrik ba khih,
Katba na suiñ ka Sngi ka mih;
Hynrei ka Wiang b'la bam sarang,
Ia Maia blei kam lah phalang.

PART - VI

KA LYER BA BEH KYRTHEP

1. Nga sngew ka Lyer ba beh kyrthep,
Halor ka Bri u hynñiewtrep,
Na ki duriaw ba jngai;
Ka kyrhuh jam ha sngi-synñia,
Ka pynsuhjer mynsiem jong nga,
Kumba ha Ri ki rngai.
2. Ka Khlaw ka Btap ka khynwin jlang,
Ki Dieng ki Siej ba shah ha phang,
Ki pyndem la ki khlieh;
U Wei u Ar ba eh ryndang,
U kyllon kram tang mar shiphang,
Ban tyliep hapoh ktieh.
3. Ha suiñ u Lyoh ba rben pynkhih,
Na lyndet Lyoh Kjat-Sngi ki mih,
Pynsyaid ka pneh Mariang;
U ngap u lwai ha suiñ u her,
Tang Jingiwbihi ba kit ka lyer,
Na trai ranab mawsiang.
4. Ka Lyer ba beh halor u Phlang,
Katba ka Sngi ka shit kyr-ang,
Ka ñiat noh ia ka syep;
Ha jingkynoi ka Sngi ba syaid,
Lyngngai u thiah ba shoh buaid,
U khun u hynñiewtrep.

5. Ka Lyer ba beh suki ka jah,
Dienjat jongka ha Bri ki sah.
U san u Niut u Phlang;
Ynda la beh ki 'er-kytiah,
Ha madan lin baroh u thiah,
U paid ba bun balang.
6. Katba nangbeh ka Lyer u Slap,
Ki Maw Nongrim suki ki hap,
B'la seng U Long-Shua;
U Niut u Nier ba san jyndong,
Tang beh ka Lyer u rat dyngkhong,
Nongrim ka pad ka pra.
7. Bunsien na kliar ki lum bajngum,
Nga i syrtap u Lyoh ba dum,
Ba kyllaiñ ha suiñ-bneng;
U Niut u Phlang bym ioh jingshai,
Um tip ka mon ka diang ban phai,
U pur sakma kylleng.

PART - VII

KA KRISMAS BASUK

1. Ka Tlang bakhriat ka kah syrngiew,
Suhjer u briew baroh;
Krismas Basuk kum jingphohsniew,
Ka wan bad ka leit noh.
2. Nangno ka wan, shano ka leit,
Ei ban iathuh ia nga;
Thymmei u hynñiewtrep ngan peit,
Ban lap ia shisha.
3. *"Ki Hynñiewtrep ki Kpa-Kulong,
Ki wan na Ri U Blei;
Symbai Byneng baroh ngi long,
B'la be! ha sla pyrthei."*
4. Kumta ka iaid ka khana-tang,
Ka Jingkieng Sohpetbneng;
Bad nangne um u thah ba lang,
Ba ai jingtngen kylleng.
5. Lada Symbai byneng ngi long,
Bynta shata ngi don;
U Blei ia ngi na bneng na jrong,
Un pdiang lada U mon.
6. Hynrei la dkut ki ksai ka Hok,
'Kieng Sohpetbneng la jah;
Ngin sngew sarong shuh aiu lok!
U Lyoh ia ngi u kah.

7. Lada ngim lah ban kiew shatei,
Bynta lajong ban wad;
U Blei ba sbun U i-synei.
Kumba U thaw ki lad.
8. Lyngba ki Aiom Shong-Pyngngad,
Pateng barim ba jah;
Ki sur ha shkor ki wan pashad,
Khubor na bneng ba phah.
9. La rai, la rai ki Yrta-Bah
La rai ha Khet ka bneng;
Hok bad Jingsuk ha Pyrthei phah,
Bad Hima Blei ban seng.
10. U khun bynriew, jaka-jaka,
Kylleng ka snieh pyrthei;
U khmih lynti da kumno sha !
Kan wan ka Hima Blei !
11. Bun-bun na ki ki khmih lynti,
Da bor bakhraw Kan wan;
Ha jingtyngshaiñ ba kum ka Sngi,
Ba khmat briew kam lah shan.
12. Ka Phreit barit, U Khun Lymboit,
Jingdum ka pop ki weng;
Ha Jingsngewrit hapoh Shyng-oid,
Ka Hima Blei yn seng !
13. Jar-jar hapoh ka sem kulai,
U Khun U Blei la kha;
Ka Doh ka Snam ha U la ai,
Ban mad ia jingmaia.
14. Katno jinghun ka jinglongdoh,
Ha jingkyn-oi pyrthei;
Ba Hynñiewtrep kin lyndet noh,
Hukum Kyntang U Blei !

15. Katba byneng ka khynwin jlang,
Jingiaroh pyrtnei ai;
Ka pyrtnei dum kam lah shemphang,
Ka ioh-thiah suk lyngngai.
16. Ki ksuid ki khrei ki sngewthuh ryhiang,
Shano ka Lyer ka beh;
'Jingkieng sha byneng la pun biang,
La tiar iapom ki khreh.
17. Ha Ing u Syiem napoh kyndong,
Ki pasiauw ha ki shkor;
Ka Khet kordor ba phi phi shong,
U wan ban knieh jubor.'
18. Khlek, wait rupa u Syiem ka khih,
Khynwin ka iam-briew ir;
Hynrei Khun-Blei la phet sha rieh,
Sep-ei ki kam lamwir.
19. Ha 'Per syntiew ka Longbynriew,
U puh u 'Tiew byneng;
Tynrai jong U ka ngam jylliew,
Nongrim ka Hok ban seng.
20. Laiphew pura ki snem pyrtnei,
U mad ki jingpynshoi;
Bad jingtynjuh ba shi kad-dei,
Bad pop ba nang kharoi.
21. Kat sha ba leit kylleng u lap
Ahor ka pop ka sang;
Lumpung ka Longbynriew pyndap,
Lynghen kum ktieh ba lang.
22. Lai snem kynthih U ieng ialap,
Ka jingkitkhlieh U shim;
I'u briew baroh ha pop b'la hap,
Ban ai ka jingpyn-im.

23. Bynta ka Hima bneng ban ioh,
U Symbai ba la sep;
Ka Jinglong-Blei ba la duh noh,
U khun u hynñiewtrep.
24. La plie ka lad i'u briew baroh,
La plie ka Lad kyrpang;
Ka Jingim bymjukut ban ioh,
Jingkhang bneng ia plie-wang.
25. Ymdei da bor ne spah pyrthei,
Bad shiryenieng ki hok;
Dei da Umjer ka Jingmap-ei,
Sha bneng la siang surok.
26. Baroh U khot ha U ban ngeit,
Khubor-bneng B'u pynbna;
"Nga long Lynti sha bneng ban leit,
Jingim bad Jingshisha."
27. Ka Ram u briew h'u ksuid ban siew,
Ban lait na ka kuna;
Jingkhum ban loit, sha bneng ban kiew,
La jingim ai ban kñia.
28. U Rang 'iar-Khad U Blei na bneng,
U pynjaw la ka Snam;
N'u Dieng phasi ka tuid kylleng,
Ban siew dep ia ka Ram.
29. Ban ieng rangbah u briew ha tbian,
Jutang barim ba jah;
Khun-Blei halor Diengphna u sdien,
Jingieit Ki Yrta-Bah.
30. U la leit noh sha la U Kpa,
U Blei u Syiem ki bneng;
Ban shim kynti la i bynta,
Hima pyrthei b'la seng.

31. Un sa wan pat halor ki lyoh,
Da Bor bad Burom bah;
Ka khmat ia U kan i baroh,
Ym don ba lah ban kah.
32. Hangta Un synshar da ka Hok,
Ka pop Un syllad phar;
Ki bor pyrthei bad ksuid Dujok,
Kin duh kin jah noh jar.
33. Lada ngi ngeit b'Un sa wan pat,
Ngin pdiang 'KHUBOR BABHA';
Ngin ioh ban mad ki 'er-pyngngad,
KRISMAS BASUK shisha.

*'Naba U Blei U la ieit katta katta ia ka pyrthei katba
U la aiti noh ia la U Khun ba la kha marwei, ba u
ei u ei ruh u ba ngeit ha U un ym jot shuh, hynrei
un ioh ka jingim bymjukut.'*

(Io 3:16)

PART - VIII

KI RONG BA PHALANG

KI RONG U SIMPYLLIENG

- 1 Nga i ki rong ba mih na rngai,
Jadu ka Mariang hi;
Ki rong u Simpyllieng phyrnai,
Hadien ba iam ka Sngi.
2. Nga i symboh ki ummat kthang,
'Nampliah jingshai thaba;
Ha sharing lum ki rong phalang,
B'la pait sapied sapra.
- 3 Bunsien ia nga ki pynshoh-bieit,
Nalor ki lum ba jngai,
Hynrei tang mar ia seng jingieit,
Kyndit ki jah sha rngai !
4. Ko khun khlieng kpoh u slap ka Sngi,
Ngan lei ki rong phyrnai !
Ki dei ki rong leh khaw-pyn-i,
Kumno ia ki ngan rwai ?
5. Ko khun khlieng kpoh u slap ka Sngi,
Aiu ia phi ngan jer ?
Lada ki rong phyrnai jong phi,
Ki jah tang beh ka lyer !

KA 'TIEW LALYNGNGI PEP SHAD

6. Nga tip ia jingbhabriew jong phi,
Jingdonakor bad jingtipsngi,
'Tiew Lalyngngi pepshad;
Hynrei la por phim nang ñiewkor,
Shadien ki ieh ki lok ki jor,
Marwei phi jaw ummat.
7. Marwei-marwei phi shong klet-hat,
Ban riam ban beit jalani sat,
Khlem tyngkai la ka por;
Phim tip seh mo ! ba ki rongphong,
Kim kren kham jam ia ki jinglong,
Ba ki briew ki ñiewkor !
8. Ha ït phi iapbieit ia lade,
Phim pyrkhat lem ki nongmane,
Ba peit kmang sha phalor !
Phim tip seh mo ! ba ki jinglong,
Ki kren kham jam ia ki rongphong,
Bad ki briew ki shahshkor ?
9. Peit lieng kynda ha duriaw-bah,
Ban poi ryngkew kumno ka lah,
Bad la jingkit ba khia !
Halor jingat-phyllung ka kam,
Ryngkat ryngkat bad ki ka jam,
Ieh-noh jingpynbyrngia.
10. Tyllun ki shalyntem ka por,
La kum um-saw na lum sha thar,
Shong byrngia kim ju ioh;
Lada halor phim lah ban per,
Ryngkat ryngkat bad ki ban her,
Phin shah iuh-roit shapoh.

11. Bunsien marwei nga ju ioh-i,
Na kliar ki, lum ba jrong ka Ri,
Da ki wei pat ki khmat;
U 'Tiew-tyrkhang ba sah tyrkhong,
Dier por u phuh bad jlop nyngkong,
Marwei u jaw ummat.

KA PAR DEWIONG

12. Na kliar ki lum ba sop 'lang-iap,
Ka Bri u hynñiewtrep 'ñiewskum;
Nga sngew ki sur jing-ud shempap,
Katba jar-jar ki tuid ki um.
13. Kyndit 'kaiñ-iong wan rah khubor,
'Poh tnum ba dum ka Thei-khyllud;
(Lap tieng ioh sah khynraw dier por !)
Marwei ka ud ka iam pangnud.
14. Ha sharing-lum marwei ka ieng,
Jaiñkup phalang ki rong ba pher;
U kynjri ksiar ryndang ka deng,
U shñiuh rymphai ka beh ka lyer.
15. Ka nam jong ka kylleng ka her,
Ka spah ka phew jingdon-akor,
Ki khring ia khmat bynriew ba pher,
Kylleng sawdong na lum na thor.
16. Khyrdop jong ka rynghang ka plie,
La jinglong-shida pyn-i lut;
Nong-wei nong-ar ki phuh samrkhie,
B'la lap b'la shem la i bamut.

17. Ha la rympei ha la phalor,
Ia ki ka lam ban ai jaka;
Pynpaw jingsbun jingdon-akor,
'Tien-ieit ia ki ka khot 'ma-ma.

18. Jingbha jingsbun jong ka ki nguh,
Ban sngew kum ba ha-ing ha-sem,
Jinglong 'riewbah suki ka duh,
Shabi ka sei na la shadem

19. Jylliew ki ngam ban sei ia spah,
Ha khrum jongka Mariang b'la tep;
Ka 'nong-kamai sha jngai ki phah,
Julor ka Bri u hynñiewtrep

20. Ynda la poi ha trai mawsiang,
Bad rum bad neng la tih la ngam,
Sawdong ki peit ki i la biang,
Ia ka ieh-noh jynduh-jyndam

21. Ko Par dewiong ka Rı lajong !
Shano 'ma-ma' baicit jong pha ?
Ka spah jong pha ki la dep khlong,
Thylli marwei phan shong shirta '

22. Kum rew ngap ba la sah thylli,
Um ngap ba-thiang na pha la lut;
Ngap-lum ban peit u la ijli,
Ngap-ksing bapli shu ud pangnud.

23. Nongrim jong pha ha şyier ka shong,
Halor ki syrtap stang ka ieng;
U kruiñ napoh u bam u pong,
Ki thliew, ki syar, ki snur kylleng.

24. Ki myrsiang bad ki mrad thrangsnam,
Ha krung jong pha kin im kin kha,
Ki shiah, ki bseiñ, ki ñianglartham,
Halor muluk kin seng hima
25. Ko khun lumspah ka Jait-ka Khong,
Lawei jong pha ha syier ka ieng;
Lyndet jingsneng u Ni u Kong '
Jingma ia pha kin ap kylleng.
26. Ki paila ksiar ba pha pha deng,
Ka pansngiat ksiar ha khlieh ba phong;
Katba ia pha ki pynsngewmeng,
Pukri jingim ka nang tyrkhong.
27. Halor ka Bri u hynñiewtrep,
Marwei phan ud ka pang bampong,
Ynda ka sngi na pha ka sep,
Ummat ba-kthang ha nga kin long.
28. Ko buaid-spah padai pylweng,
Phvlliew kito ki bitor iong,
Da Umpohliew ki Umjer Bneng,
Jingpang jong pha, dawai kan long

PART - IX

KI SUR KA LAWEI

1. Katba ha lum nga shong bam-lyer,
Ki sur bathiang ha nga ki per;
Ka mynsiem ka shadkmen;
Kyndit na nga ki jah noh jar,
Jingdum barieh sor-sor ka par,
Napoh u Lyoh ba rben.
2. Ha ñng ha sem ha it-hima,
Kynjah ki sur ka Duitara,
Ba tem ha ri ki blei;
Jaid-sur ba ngiew bym iahap tar,
Na ka Lawei sor sor ki par
Ki kyn-ud ha rympei.
3. Ki sur bathiang ka Tangmuri,
Kin her nalar thapniang Pukni,
Khun bsein kin mih na rieh;
Ki khun ki ksiew ki Hynñiewtrep,
(Kum 'Si-Kyrtong, shoh Khaw-tyndep).
Kin kohnguh la ki khlieh.
4. Ki umpohliew kin tuid jar-jar,
Ka Jaidbynriew kan nang kham-tar,
Sailung ka Bri khyndew;
Na lyndet Lyoh ka Sngi kan saw,
Na poh dewmet kin mih ki maw,
Ki um kin kha ryngkew.
5. Mynsiem jingshlur bad jingieit-rı,
Ki rong ka nam leh khraw-pyn-i,
Ha ki rynsan ba jrong;

Akor burom ba ngi iaroh,
Kin sa buhrieh ha lyngthohdoh,
Hangta ban sah tyrkhong.

6. Kino ki kur, ki kha, ki man, !
Ka jaid-kynja nangno ka wan ?
Tynrai ka Longbynriew !
Khlem tip ka Sang, khlem tieng ka Ma,
Kum 'Liem matlah ngen-ngen shu tda,
Ka snam ban ioh phylliew.
7. U Syiem U Kmie, Bakhraw-Batri,
Kylla paid-bhur ha Thiar ka Ri,
Ba tuid ka ksiar rupa;
U Khyndai-khup, U Hanga-mei,
Da kam lamwir un thaw pyrthei,
Ka Ri sa pait sa pra.
8. Naduh tyngkong haduh phalor,
Rasong kan ieng ka Thok Shukor,
Ha ki lypung kan shad;
Ka Hok ka Sot kin sah rangli,
Ha ki kyndong kynshrot ka Ri,
Kan buhrieh la ka khmat.
9. Ban ioh lum spah, ban ioh long khraw,
U 'Len-thrangsnam un khic khynraw,
Ka syep shi khiew ranei;
Jingim kin kheĩn shi shlim-duma,
Ka Ri lajong kin buh bynda,
Ka Ri baieit ki blei.
10. La syep la syar kim pynmih shuh,
Ka tuh ka thiem kim lehraiĩ shuh.
La ha dum ne ha shai;
Ka spah bym-hok kan talaiĩ kti,
Kan leh jadu kylleng ka Ri,
Kan bet la ki symbai.

11. Ha trai Mawseng kan sah ki snar,
Syrtap ka Jaidbynriew pyn-pyar,
Ban rieħ ka 'Men-ri Thlen;
U paid ba iar ka Ri shi sur,
Un tah ki rong ban kylla dur,
Shata un leit rieħ-tngen.
12. Baroh, baroh, shynrang, kynthei,
Kin dem khohsiew kin mane Blei,
Kin bud I'u 'Suid Tanjang;
Sha jngai kin phet ban klet pyrthei,
Hangta ban iam ban rykhie marwei,
B'la dih umshit kha-blang.
13. Ka Niam rukom, ka Mangkarong,
Ha sla ba per jingim pynshong,
Ban kam ia duriaw bah;
U Blei kynrad, Nongbuh Nongthaw,
Un sa iaïd lait na jingkynmaw,
B'la shong kulai ka spah
14. Jingsneng jingkraw kin long kam bieit,
Ym ia pei shuh ka ktien thylliej,
Ha bar ne hapoh iing;
Ki khun ki ksiew, ki kmie ki kpa,
I wei ia i wei shet kylla,
Ha rympei ba khlem Ding
15. Ki Mawlynnai ka Duitara,
Da ummat kthang b'la saiñ b'la shna,
Kin duh la jingphyrnai;
Umjer kin sah hapoh u Phlang,
Wat la ka Sngi ka shit-kyrang,
Kim her sha ri ba jngai.
16. Ha ki wah-duid ki umpohlieu,
Ba dih ki 'Rang ki 'Thei bhabriew,
U Ksih un ai 'Sew-tham;

- Nalor Diengbah U Tyngab iong,
 Da sur ba jam un pyrta shnong,
 Ki rympei kin sangam.
17. Ka Panora baieit bathiang,
 Hapoh U Lyoh, u Pyrthat rykhiang,
 Kan pang kan kylla dur;
 Ki riat ki them ki khlaw ba jngum,
 Ki lum ki wah ba sawa hum.
 Kin buhrieh la ki sur
18. Jar-jar ka Sngi phyrnai kan sep,
 Ka Shakaina ki Hynñiewtrep
 Ba shat na lyndet Lyoh,
 Ha krem Lamet, ha krem Latang;
 Ruma un kai u paid u shang,
 Jingdum kan tap baroh,
19. Ko Kong ko Hep ! ong seh ma phi,
 Ka biang ia ngi ban long sakhi,
 Ha la Bri la Basa ?
 I Ding ba shat jingshai kylleng,
 In jah noh jar kum Sohpetbneng,
 Jingdum kan tap shi-rta ?
20. To ong sa phi, ko Hep ! ko Bah !
 Kong Rit, kong Heh, Kong Thei, Kong Nah,
 Khlem Ding ha la rympei;
 Ngin roi ngin par hapoh jingdum,
 Kum tham-khapmaw ha krem dam-um,
 Ki khun tham ka Lawei !
21. Ko Rang Iar-khad, ko Saw-shyrtong,
 Ko Nongbah-khlieh na bneng na jrong,
 I'U Symbai ba la sep;
 Sa tang ha Me nga iai kyrpad,
 To krad lynti, to thaw ki lad;
 I'u khun u hynñiewtrep.

IV. Ki Sonnet

i. KA DEWMET BA LYNGKI

Dewmet, Pha hun ban sah lyngki shirta !
Hapoh jingkah syrngiew u Lyoh ba dum !
Mano ban tip jingwan jingleit jong pha ?
Khlem da thaba jingshai shaneng sharum;
Lada u Lyoh ba kah um kad um pra,
Lada jingshai ka Sngi, Pham i khlem kah,
U Symbai-bneng b'la tep hapoh jong Pha,
Un shu sep-ei namar suhthied um lah.
Kyndit ! Kyndit ! Ko Dewmet ba lyngki !
Na jingkynoi ka Nep u Lyoh ba dum;
Peit-shaiñ ki khmat ia lade ban ioh-i,
Ha it phyrnai ki dew ka pung ba jngum;
Khyllied ka Nep, ai lad jingshai ka Sngi,
Kan kdup ia Pha, ha jingieit-bneng ban jngi.

ii. KA LYNTI SHA BUROM

Ka Spah phi lum, shuki ka Bor phi shong,
Kumno ia ki phi ioh ! Phim kwah ban tip;
Ka wei phi tip, ka Burom phi beh thong,
Katba 'Sai-hon ka Jingim um pat lip.
Ka jingsarong phi kynrup khlem sngewthuh,
Ka Bor bad Spah ia phi ki pynthame;
Jingim kordor hakhmat jingjot ka buh,

Ka Lynti sha Burom kam dei kane :
Burom ka iaid halor ki'lynti khim,
Bad ki jingkieng b'la pun Ka Jingsngewrit;
Phin ioh ban mad ia ka ha la jingim,
Lada phim sngew-salia ki jingpynwit;
Jingsngewrit kup, loitnoh ka Jingsarong,
Hangta Pansngiat ka Burom phin ioh phong.

iii. KA KHUBOR BABHA

Ki khmat nga peit, ki shkor nga pynshah ryhiang,
Nga ap khubor ba wan na jan na jngai;
Na lum na thor, ba kit ki lyer ba thiang,
Halor ki saw samoi ka Ri kynjai;
Khubor baroh ba nga ioh-lum ioh-lang,
Jingtieng ki bet, jingnoh-mynsiem ki ot;
Pynpait dohnud, pynjaw ki ummat kthang,
Pyrthei sohsat, Ah !, Pyrthei jinglanot.
Nga thrang ban iohsngew ka KHUBOR BABHA.
Ha jingjinjar ia nga ba ai jingkmien;
Kyntiew shalor ka long-rynieng jongnga,
Da jingsawa ki sur ka jingkyrmen;
Kyrshan ia nga ha syrngiew ka jingiap,
Mynsiem jongnga, ha Dujok kan ym hap.

iv. KA JINGMAP - EI

U khun bynriew baroh ha sla Pyrthei,
Jingsuk u wad haman ka khyllip-mat;
Synñia bad sngi u kyrpad sngew-synei,
Hynrei jingsuk wat syrngiew kam pashat.
Ka Bor bad Spah, la jingsngewbha ki phriang,
Ramia jingsuk, pynthame ia ka Doh;
Kum dur bhabriew, buhrieh dohnud ba rykhiang,

Ha jingsngewsih, jingiap kan sa rong noh.
 Symbai jingsuk b'la bet ha sla pyrthei,
 Umjer byneng ban dih dohnud ba sliang;
 Pukri jingkmén, mynsiem pyndap pyn-shlei,
 Dei 'JINGMAP - EI', ba ngi ai bad ngi pdiang.
 Shabi b'la buh tyngkai da ki pateng,
 Khyrdop ban plie, ban rung sha HIMA BNENG

KA EROPLEIN KHLEM PAILOT

Jingim ka long Eroplein khlem Pailot,
 Nongthaw na bneng pynher ha sla pyrthei;
 Shem-hok, shem-pap, shem-shitom shem-lanot,
 Nusib jongka ymdei ba thaw u Blei.
 Ka Thong jongka ban poi sha Hima bneng,
 Ka poi, ka poi, ka shong tang ha ka hi;
 Lada ka pynshah-shkor sharum shaneng,
 Kan duh Khubor na bneng ba lam lynti.
 Nang her, ko Eroplein Jingim ' nang her,
 Lyngba 'Er-iong 'Er-ngit u Lyoh ba rben,
 Wat sngap Khubor pyrthei ba kit 'ki lyer,
 Bad la jingkit to her da jingkyrmen.
 Ha Dohnud pdiang Khubor na bneng ba phah,
 Ha Steshon bneng, phan hiar suk khlem jingkah.

vi. U PUD KA POR

Ha sla Pyrthei ngi iaíd lynti shípor,
 Lynter lynti, marwei ban jam te em,
 U Blei basbun U ai ki lok ki jor,
 Ha Lynti-iaíd ban btin ban kyrshan lem;
 Hynrei phylla shikad-dei eh, ym dei ?
 Baroh-baroh ia ñiom ban kam sha khmat,
 Khlem jingsngewlem, jingieit, jing-isynei;

Khlem tip katno ka phang ioh iaid ryngkat;
Kyndit ngi ryngkang ia U PUD KA POR,
(Jingiaid ka bteng wat shalyndet jingkah),
Shadien baroh ngi ieh ki lok ki jor,
Bad jingkyrmaw, shipor bad ki ban sah,
Katba shipor ngi iaid ha sla pyrthei,
La kti ba sbun ban kner ia ki ngi dei.

vii. KA JINGKYNJAH BA NGIEW

Haba ki khlur na khmat jong phi ki sep,
Sharak jingkmén na mynsiem jar ka lip;
Naduh na iing shaduh sha lum jingtep,
Jingmut ka her sha ki pyrthei bymtip;
Katba hapdeng u paid ba bun nga ieng,
Ha kut Lynti jingim ba dei iaid lang;
Ka jingkyrnjah ba ngiew ka par kylleng,
Dohnud ka paid, ki jaw ki ummat kthang,
Katba na lum jingstep sha iing nga phai,
Syrngiew jong phi ka sha ha man ki lad,
Nga sngew kumba nga don ha Ri ki rngai,
Ka Ri ba shalyndet ki jingpyrkhat;
Kynjri jingieit ba skhem ia nga phi teh,
Ryngkat bad phi ngan poi ha Ing-Shongneh

viii. U LUM JINGIM

Ka bor nga sei nga pynlut la ka por,
U thiep ba jrong, u Lum Jingim ban kiew,
Lynti nga it ha kyndong bad ha sor,
Ha kliar ban poi ban shong pyngngad wei briew.
Na kliar nangta, artet kiew shuh ngam lah,
Arsut nga khmih, nga i ha snieh pyrthei;
Ha lum ha them, na trai ba lang u Thah,

Ki Um Jingiap, kylleng ki tuid ki shlei;
Ynda arsut u Lum Jingim ngan hiar,
Halor ki kjat ki Um Jingiap kin tuid;
Ha trai U Lum, ki pyntha phlang ba-iar,
Ha jingjylliew, jingshlei ia nga kan nguid;
Ki lok ki jor ba ieng ia jaw-ummat,
Khublei khadduh ngin ia ai bad ia khlad,


ix. SHA LYNET KA JINGIM



Ynda ka Sngi Jingim na nga kan sep,
Mynsiem kan her sha la U Trai Nongthaw;
Ban wad ki Hok kynti ki Hynñiewtrep,
Mynnor b'la ieh, ban kamai nongkhynraw.
Ka Met b'la tlor, ha lum ha trai u Phlang,
Hangta marwei, jahthait shipor kan shong;
Ka pneh Mariang kin sah ki khanatang,
Halor ki sur ba kit ki lyer jing-ong;
Kin sawa jam ha suiñ nador ki kseh,
Na ki 'sai-sviang ki kshaid ba lieh ba jrong;
Na ki wah-um ba tuid khlem jingsahngheh,
Ba kyrhuh jam halor ki mawramsong;
Halor ki pung ba shad ki dew phyrnai,
Na ka shyntur ba kyn-ud sur jigrwai.

x. U 'TIEW LATOS HA NAN PALOK

Ko 'Tiew Latos ba puh ha Nan Palok,
Halor sla-um phi per phim ju iap-stai;
Rymmuiñ phi wiat nongpeit-kai ha surok;
Katba sawdong thapbalieh ki iaiaid kai;
Ki thied tynrai, ban dih ka syrwa-bang,
Ha um ki sdien, poh khyndew kim shah teh;
Kumta phi san la 'lapbah ne la rang,

Phim lah khylllem la 'eriong-bah ki beh;
Ko 'Tiew Latos, Phi ai mynsiem ia nga,
Ki ksai jingieit pyrthei ban pyn synjor;
Mynsiem kordor ban lait na jinglyng-a,
Jingkhum ban law, katba dang don ka por,
Ynda samoi ka jingim ki la kut,
Pyrthei shadien ngan ieh-noh khlem sah-nud.






La pynmih da u juh u Nongthoh



“KA SHARAK RIT”

(Ki Poetry Khasi).

Lah ban ioh na:



Khasi Book Stall, Shillong.

M/s. M. Lyngdoh,
Mission Compound, Shillong.

Shillong Cooperative Marketing Society.

Seven Huts Enterprise, Shillong.

Massan, Iew Musiang, Jowai.

Bad kiwei kiwei de ki dukan.



Rs. 15/-
